

Nehemia

Nabi Nehemia arye nyalamuk yupu

Nehemia arye Israel nang ati, Allah morobuk yupu

1 ¹Hakailya el mi Nehemia bira, minopce Israel nang ulamikak, ulamuk bukni, sik Persia tam ninye arye, Israel nang sirya obikce, tapu koubuka sik mutuku Persia tam bobinamikba, Israel ninye keteng tamun yupa weik, daulamika ani, aminyan talak Persia mutuku batakuka, tuba tamubuka, Yehuda tam noutamak yanuka ulamik. Nehemia birye nyabuk yupu ara ani.

Na ara, Persia mutuku talyamuknye Raja Artahsasta birye, Persia tam talyamukba, keteng tamun yupa dua puluh tahun noutamak bukni, wala si ara, Kislew deice arye, sik olan nang kum yanmanto keil aik, amutuku si ara, Susan mutuku ulamse. Amutuku ulamse talak ara, na weit koprop tonok, el si ara Hanani birye, na dam yanuka nyapnuk. ²Na tamnye Hanani ap, el kwit capu yuk nang ap, Yehuda tam arye, na dam yayik. Yayikba sik ti asipdese. “Minop talak sik Persia mutuku nang arye, Israel ninye bukni, Yehuda tam noutamak ulamik nang nirya obuka sirya dakikce, Persia mutuku bobiyikba, keteng tamun weik daulamik ani, ton nang diamik bukni, ton nang ara, tuba tamubuka Yerusalem mutuku biyik nang ara, yata wiribuka unyak do? Teleb unyak do? Tonda, nun weik asik Yerusalem mutuku domupu asik ara, teleb ulul do, malye do?” nyabuka asipdese.

³Asipdesibuk, sik anang arye tamubuka, “Persia mutuku nang arye obuka sirya daksikce, sik mutuku bobinamsik nang ara, ton nang ara diamik bukni, ton nang yupa ara, mitiktonun tuba kam ukirye, tamubuka Yerusalem biyike. Sikda, Yehuda tam Yerusalem mutuku dam tamubuka biyik bukni, ikin weik unyake. Unyak buk, yuk mutuku nang arye, anang ati nalinyakba, alye weik ulule. Tonda, Yerusalem mutuku weik keil foka

domik ning ara, dakuka uluplobik touk, tuba aubuke. Afoka bublan ara, uku dongobike,” nyapnike.

⁴Na kwit capu arye ayupu nyapnikba, kekepse ning ara, aning atibuk tenipsirye, tukwak bukuka engepse. Malye kanye bobuka engepsa ara, like tonok talak arye kume. Ara, asum-asum nirya din dina kumce, ikin kanye bobuka engelamsirye, im deice ulirye aning-aning nirya talilul Allah ati, mikip arye moropsirye nyapse.

⁵Se, na ni Allah, im deice ulyamnye bira, anda kwelina weik mikipnye ulyame. An ti ara, ninye tukwak nang nirye arye, ‘Se, elda, weik mambule,’ tenekinyake. Ance, “Aning ara wininamlume, aning ara kum wininamlume,” nyapdeiamsulum yupu kekebuka ayupu atonun unyak nang ara, an deice uk sik kanye talima akunum deiyamkike. Ati, ance nun ti bico tenebuka, weik arye melisilyame. Ati ara, ance, “Na nyanye yupu moubuka kekepmiye ura, na arye winibuka melipnamsine,” nyabuka, nyalilamsulum yupu dipkoprop winisilyame. Tonok ning babye kum batakasilyame.

⁶Ati ara keteng noutam babye, lukunyan babye, na arye an ti tuba morokunune. Na ara an amutam uniryte, an fil uk donune. Ara, an amutam unyak ninye, Israel yala nang nirya ati morokunune. Naio, ‘Anda adib aryuk kekena ap, dina ap umince nirya biknalam’ tenen, morokunune. Nun Israel nang nirye arye, an ti malye unyabe. Ara, na ap, na ni yapu ap, na yala nang nirya ap arye, an dam nun malye wininyap ning atibuk, laka nyapne. ⁷Dipkoprop an dam nun fia malye wininyabe. Ance, “Aning ara wininamlume, aning ara ton kum wininamlulume,” nyabuka, Musa dam nyapdeiyalum touk, kum wininyabe. Ayupu nirya yanibtabuburye, malye uk wininyabe.

⁸Na ni Allah, ance an fil donanye Musa biti nyalalum ning uk, tuba tonap tenipnulyame. Ance nyaplume. “Anggunce na nyapmasin yupu atonun kum winipmunye ura, anggun wenepsiniryte, yuk mutuku nang noutamak wilibuka yuk-yuk mutuku weike deipnin banamsine.

⁹Bukni, winipnamsina babye, anggunce tamubuka na dam yamunce, na arye, ‘Aning ara wininamlulume, aning ara kum wininamlulume,’ nyapse atonun kekebuka winipmunyop ura, yuk mutuku nang arye obisipsikirye, fia yukak bobinamsitinga babye, anggun kwit capu mutuku sirya, im sirya, daunamting nang babye, na arye bulubuka, tonokak deipnamsine. Ara, ‘Aunamlume,’ tenen, wibuka kintinipdeiyamsisak uk umunce, na si erenamnlume. Ara, ‘Na si asukum unamle’ tenen, ‘Kintinipse mutuku ati nyapsine,’ nyabuka, nyapdeipsulum yupu ati nyapkine naio.” Nehemia birye nyabuk.

¹⁰Nyabukce ayupu ton nyabuk. “Na ni Allah, Israel ninye ara, an mapu unyabe. Israel nang ara, an amutam ubiryte, an fil melin nang atonun unyabe. Tonda, an taruk deice ap, an weik mikip deice arye,

lyepdomsulum nang unyabe. ¹¹Ati ara nai, na ara an amutam fil donunye birye, an ti moropkin yupu ara, kekepnilyame. Tonda an mapu arye an si ati, fia kanye deibuka ukirye, ‘Elda fia mambule,’ nyabuka, an si erenyak ninye arye, sikce ton morokinyake. Sik moronyak ning babye, kekeplyame naio.

Naio, aning nirya ara, na moropkin yupu kekepmince, ‘Arup sum ara, bico tenebuka melipnutume’ tenen, moropkine naio. Ara, melipsiminya deice arye, ninye deiyoknye Raja, el dam binuka yupu nyapnyop ura, ‘Elce kanye deipnuturye, kekepnutop ura, telebe nyapnutue’ tenen, moropkine naio,” Nehemia birye, Allah ati nyabuka morobuk.

Aning nirya moropse talak ara, na arye weik deiyoknye Raja Artahsasta, el mek makau boyangana deiyoknye ulamse. Nehemia birye nyabuk.

**Persia tam Raja Artasasta birye, Nehemia weipdeibukce,
Yerusalem mutuku bana ati dopdeibuk yupu**

2 ¹Na Nehemia bira, Persia mutuku ninye deiyoknye Artasasta, el anggur mek din talak, mek makau moubuka boyangalamsinye ulamse ati, Raja arye, Persia mutuku tam talibuka ulamuk talak ara, keteng tamun dua puluh tahun noutam arye, el dam nyalbise. Ara, el melin nang arye, ‘Anggur mek dipnul’ tenen, el anggur din mek boyayikop ura, amek makau dopropsirye, Raja dam binuka aripse. Yuk talak, el dam balamse talak nirya ara, pin-pin asa ulamse bukni, asup ara, lik kanye bobuka pin-pin kum upmanukba, el dam bisiba eipnuke. Eipnuke, asipdenuke.

²Lik kanye bopsiba elce na ti nyapnuk. “Amio, anda yata ati urasin lik kanye bopmanilam do? Uk kum dinmakil bukni, yata deiyok ati, an urasin yuk upmakil do? Na kanye ara, an talima noutam ara, ikin upmakile,” nyapnuke. Nyapnuka ati, na lukdase.

³Lukdaseryuk, na arye tamubuka Raja ati nyapse. “Naio, na patapnil ning ara, anda fia kam unalame. Na ikin upnil ning ara, na ni yapu diamikba, tuku palibuka wilamik mutuku ap, anyasik domik ning ap, yu nang arye dakuka uluplomik touk, tuba malye ulule. Tonda, anyaik buru tam sik bisik wekelbalimik foka bublan ara, dakuka uku dabikba uku dibuke. Aning nirya malye unmala ati, na lik kanye bopne,” nyapse.

⁴Nyapsiba, Raja arye, na ti tamubuka nyapnuk. “Anda yata wiriptinye tenepmalam do?” nyabuka asipdenuk. Ninye deiyoknye birye asipnukop ura, na kanye talima fum tam arye, Allah mutuku-mutuku nirya talibuka, im deice tam ululnye biti moropse.

⁵Moropsirye, Raja biti nyapse. “Naio, ance na ti bico tenepnimince, ‘Anye bira telebnye,’ tenepnutumce, ance nyapniminyeba, na Yudea mutuku binirye, na deiyok koun deilin nang weilamik mutuku dipdetinirye, amutuku

domik asik tuba tonap moubuka dopnamne. Ati, ‘Telebe,’ tenepnimince, ‘Dabilyame,’ nyapninyop ura, tamubuka bindopnamne,” nyapse.

⁶Nyapsiba, ninye deiyoknye ap, el kil ap neika bukmarikak arye, Raja arye tamubuka nyapnuk. “Anda na dam tuba fil donilyam anya arye, bisik ara yata wiribuka mapnin binalam do? Winyaminya ani, yata talak tamubuka yanalam do?” nyabuka yupu talipnumu talak ara, Raja arye, ‘Telebe dabinalyame,’ nyapnuka ati, na arye, “Na binuka unamne talak ani, winibuka talak damapmanya ani, atalak tamubuka yanamne,” nyapse.

⁷Nyapsop ura, na deiyoknye Raja biti, ayupu ton nyapse. “Naio ‘Teleb ubuka dabinnule,’ tenepniminyop ura, ance surat ton, sekuka aripnutumba, otam mutuku talinyak ninye deiyok nang, Gubernur nang ati areptinye. Ara, otam mutuku, Efrat mek dam bukni, amek koubuka otam talinyak nang aripneba, sikce, ‘Telebe ur yalule,’ nyapdeipnikcop ura, sik mutuku noutam unyak nang arye kum opnamniyake. Teleb aryuk biniryne, Yudea mutuku binuka unamne,” nyapse.

⁸Nyapsirye ayupu ton nyapse. “Tonda amutuku yo kan-kan talibuka ulinye, el si Asaf biti surat ton aripnutumba, asurat bobuka, el ti aripnyop ura, elce weik yo webuka aripnutue. Winipminba, elce yo ton nuknilyop ura, dobukapniryne, Yerusalem mutuku noutam aik lipsisikuka dopnamne. Ara, amutuku noutam keil aik domikba, ninye olan nang kum yanmanto aik, anyaik buru tam foka bublan moubuka dopnamne.

Anyasik ara Allah ati arelbalamak aik, el si eren aik dam, ulul mambul aik dopnamne nyapne. Tonda, na un aik moubuka dopnamne,” nyabuka moropse. Moropsebuk, dipkoprop Allah arye melipnuka deice arye, Raja arye, na moropse ning nirya kekepukce, aning nirya ara, “Telebe,” nyapnukce, aning nirya aripnukce.

⁹Asurat aripnukba, na arye asurat sekeipmok ning bobuka, Efrat mek koubuka, keteng wekelbalamle tam, otam talyamik ninye deiyok nang, Gubernur nang dam boyase. Sik dam boyase talak ara, Raja arye nyabukba, el yin deiyok nang ap, sik amutam yin nang bukni, kuda basam balye deice bukuka balamik nang ap, na ap neika bipu. Deiyok ara, sik deiyoknye Raja arye, “El meliplulume,” nyabuk ura melipnik.

¹⁰Bukni, Horon mutukunye, el si Sanbalat ap, tonda Amon mutuku yin talyamuka deiyoknye, el si ara Tobia ap, sik aning kekebuka ikin kanye bopdikce, ‘El yanmal deice arye, nun mutuku ning nirya yanuka alapnusiaka ati, yanmale. Yata deiyok ati, ‘Sik Israel ninye patalul ning melipnamap’ tenen, yanmak do? Aning ara nun like,’ tenepdik.

Nehemia birye, ‘Kota Yerusalem asik, antanabuka cang keil foka dona ati, keil dikuka antanapdongopnamap’ tenen, deiyok koubuk yupu

¹¹Na adib aryuk, Yerusalem mutuku bisirye, like winilye sum arye talye mapse. ¹²Like winilye sum akunum ubukop ura, asum

lukunyan ara, kum mapse. Na ap, na mapu yata wiribuka nang do, ton melipnikba, nun neika dilbipu. Na arye yuk nang ati, ‘Na ara, Yerusalem asik dilbinune. Dipdenirye eipnyop ura, tuba tamubuka foka tonap dopnamabe. Anyaik-anyaik nirya, ton lipsisikuka dopnamabe,’ kum nyapse. Allah arye na kanye talima fum tam nyapdeipnukba, teinyamse touk winipse. Winipse talak ara, yuk kuda basam ton, na dam fia kum yanmek. Bukni, na bukmasibuk bobanmanuk kuda basam uk, nun neika banmanumu.

¹³ Alukunyan ara, keteng wekelban tam bocamik bisik bublan, ara, Mek pu donak wekuka binmasirye, tonda bublan dam mek pu si Naga, atam binmase. Tonda malye ning nirya donokolbana ati bocamik bisik bublan dam bise. Ara, Yerusalem cang foka domikbuk daksakamuk ati, afoka bublan dakuka uku damik ning nirya ati dilbinmase. Tonda bublan nirya dakuka uku damik ning nirya ara, binuka dipdesirye bikse. ¹⁴ Na adib aryuk keteng yangan tam mek pu dam balamik bisik bublan ap, ninye deiyok nang mek kekna ati Kolam Raja balamik bisik ap, binuka dipdese. Asukum ara, bublan dam bise bukni, na welebuka binmase kuda basam ton, asukum binmanto kumak ati, atam kum eipse.

¹⁵ Winipse ati, alukunyan uk mek deice tam welepsirye, Yerusalem cang keil bobuka keil yangapdeibikce, foka domik urasin ara, moubuka bine eipsop ura, tamubukapsirye, tuba tamubuka keteng wekelban tam binuka dipdesirye, dabanmasa ani, min yuma binmase Mek pu donak bublan dam uk tamubuka wekelyase. ¹⁶ Sik aulamik deiyok nang ton, ‘Asukum binmale’ tenen, kel kum bikmanik. Deiyok ara, na arye sik Yahudi nang nirya ati, ton kum lak nyapmase. Sik Allah si eren aik talibuka fil don nang babye, tonda amutuku talina deiyok nang babye, tonda afoka fil donamik nang, yuk nang babye, kum lak nyapmasa ati, anang nirye arye, kel kum biknike.

¹⁷ Winipmasa ani, tamubuka yasop ura, sik nirya ati yanuka nyapse. “Amapo ikin weik upsilye ning ara, anggun nirya akunum kel biklume. Yerusalem asik nirya ara, minop ulamupu atonun kum unyabe. Yerusalem dana-dana wiyamik foka ap, afoka bublan ap, ninye aik nirya ap ara, daklobikce foka bublan nirya dakuka uku dongobik. Winibika ati, winitalak ara, anyasik cang foka tuba tonap lipsisikuka dopnamabe. Winibibyop ura, nun nirya tuba tamubuka teleb kanye bobuka unamabe. Tonda, yuk nang arye, tuba kum nalinamsiyake. Winitalak alye weik usulul touk, tuba alye kum unamsile,” nyapse. Nyapsirye ayupu ton lak nyapse.

¹⁸ Winitalak ara, Allah arye bico tenelamnukce melipnukba, Persia mutuku tam ninye deiyoknye dam nyapsiba, ‘Telebe dafoka dopnamlame. Na weik arye melinamsine,’ nyapnuk yupu ton laka nyapsiba, sik Yahudi deiyok nang arye kekepnike. Kekepnikce, sik nirye arye nyapnike, “Ati

ara, telebe, nun neika afoka tuba tonap lipsisikuka dopnamabe,” nyabik. Nyabikce, atalak aryuk, teleb fil deiyok koubik.

¹⁹Winibik bukni, atalak ara yuk nang arye lak nyalbiyikop ura, Horon mutukunye el si Sanbalat ap, Amon mutukunye el si Tobia ap, tonda Arab mutukunye, el si Gesem ap, sik nirye arye ayupu kekebikce, nun nirya ati nalipsikce, malye yupu nyabukabikce, aku tunmasike. Nyanmasikce, “Anggunda yata ning arye winipnamalumce do? Tonda, anggunce yatato ning winipnamlumce, ‘Amutuku weik ninye deiyok talibuknye biti, yanipnamap’ teneplum do?” nyabuka, malye yupu nyapdongopsik.

²⁰Nyapsikop ura, na Nehemia birye sik ti nyapse. “Kume, Allah im deice tam ulirye, aning-aning nirya talilulnye birye tenepsuk touk, winipnamabe. El melisilya deice arye afil teleb kibuka dolamipya ani, sirya daknamabe. Nunda, Allah el amutam ubirye, nun el mapu ara, adib aryuk aning-aning nirya lipsisikuka dobibirye, afil dobuka sirya daknamabe. Bukni, anggun anyapmasulum nang tonok ara, Yerusalem mutuku noutam nun neika kum unamabe. Minop talak babye amutuku kum talibuka ulalum ati, ‘Amutuku ara nun ning anya,’ kum nyapsutume. ‘Anggun yuke,’ nyapse.” Nehemia birye, sik winilye nang, malye yupu nyabik nang ati wenebukce, nyabuk.

[Minop buku ara otam pasal 3 ton aubuk bukni, nun sekupu ning ara, pasal 3 kum sekupu ati, otam pasuluk 4 dukdongobuka nyapnin banamlulume]

Yerusalem mutuku wiyamik foka, tuba tabakuka dobik ning ati nyabuk yupu

3 ¹Ura aning ara, Yerusalem mutuku domik foka, ‘Yata wiryamukba, tuba tabakuka domik do?’ tenena ati, lak nyapsine. Allah el si eren aik fum tam fil dona weik deiyoknye, Imam Elyasib ap, el kwit capu, yuk imam nang nirya ap arye, akeil foka tabakuka dolamik talak ara, domba basam bobuka wekelbalimik bisik bublan ara, tuba tabakuka dobik. Ara, ‘Allah el si erena atibuk dopnamabe,’ tenebuka dobik. Tonda acang keil foka tuba tabakuka domik keil foka deice arye, mitik cang aik ton domikce,^a anyaik fum tam kalikin nang tiklamikce, kalikuka dilamik. Anyaik cang, el si ara, “Anyaik Seratus Cang Aik,” nyabuka si domik. Seratus Aik dam arye, dib dongobuka otam domik aik, el si ara Menara Hananeel Aik dam ara, afoka noutam nirya ara, Allah ati kintinibuka aribik.

²Yuk nang, Yeriko mutuku nang arye, Hananeel Aik dam arye dipdongobuka otam foka dolamik. Yeriko mutuku nang sik dam ara, ninye si Imri el mi Zakur ap, el kwicapu ap arye, otam keil foka dukdongobuka domik. ³Mekwen fum bal dobuka boyangalamik bisik

^a 3:1 *Cang aik*, anyaik ara, Indonesia yupu deice ara menara seratus nyanyake.

bublan nyalamik ning ara, Senaa^b yala nang arye domikce, abisik bublan botopdeiyamik. Tonda abublan dana-dana tam delilamik yo ap, deice tam delilamak yo ap, ensel ap, bisik tirikilongon ning ap, dobikke dikdongobik. Tonda, abublan deice ara, gat ning besi beton dobuka taplakdeibik.

⁴ Senaa yala nang arye memamik bublan dam arye dukdongobuka dobuka deiyoknye bira, Hakos el mi Uria birye deibuk mi el si Meremot ap, el kayapu nang ap arye, dukdongobuka tabakuka dobik. Asukum arye dukdongobuka deiyoknye bira, Mesesabeel el mi Berekya birye deibuk mi, el si ara Mesulam ap, el kayapu nang ap arye akeil foka dukdongobuka tabakuka dobik. Atonun, asukum arye dukdongobuka dobuka deiyoknye bira, Bahana el mi Zadok ap, el kayapu nang ap arye, akeil foka dukdongobuka tabakuka dobik.

⁵ Asukum arye dukdongobuka dopnin balamik nang ara, Tekoa mutuku nang arye dopnin balamik. Bukni, Tekoa mutuku weik ninye deiyok nang arye, 'Nunda amutuku fil ton kum donamabe. Akel foka tabakuka donamak fil ara, nun like. Afil dona deiyoknye birye, 'Afil doplulume,' nyapsutua babye, kum kekepnamabe,' nyabik. ⁶ Keil foka bisik botopdeibik bublan, el si ara Gerbang Yesyana nyalamik ning ara, ninye si Paseah birye deiamuk mi Yoyada ap, el kayapu nang ap arye dopnin balamik. Tonda, Besoja el mi Mesulam ap, anang ap neika dopnin balamik. Sik nirye arye, bublan si Gerbang Yesyana nyalamik ning ara, bisik botopdeiyamik. Tonda abublan dana-dana tam delilamik yo ap, deice tam deililamik yo ap, ensel ap, bisik tirikilongon ning ap dobikke, tirikdongobik. Tonda, abublan deice ara, gat ning besi beton dobuka taplakdeibik.

⁷ Asukum arye dukdongobuka dopnin balamik nang ara, Gibeon mutukunye, el si ara Melaca ap, tonda Meronot mutukunye el si ara, Yadon ap, sik neika dopnin balamdik. Tonda, Gibeon mutuku nang ap, Mispa mutuku nang ap arye melibuka dopnin balamik. Abitinye mutuku nirya ara, Efrat mek koubuka otam keteng wekelban tam talibuka ulamuk ninye deiyoknye, Gubernur arye talyamuk.

⁸ Asukum arye dukdongobuka dobuka deiyoknye bira, Harhaya el mi Uziel ap, el kwit capu ap arye, akeil foka tabakuka dukdonga dobik. Uziel bira, dekna weik ning el si ara, emas dobuka memena deiyoknye ulamuk. Atonun, asukum arye dukdongobuk deiyoknye bira, Hanania ap, el kwit capu ap arye, akeil foka dukdongobuka tabakuka dobik. Hanania bira, nintong teleb minyak memena deiyoknye ulamuk. Anang arye, asukum arye dukdongobuka otam dopnin balamik cang keil foka, el si ara Tembok Lebar tabakuka dopnin balamik.

^b 3:3 *Senaa* – Ayala ninye sik si ton Hasena sekenyake.

⁹Asukum arye dukdonga dobuka deiyoknye bira, Hur el mi Refaya ap, el kwit capu ap arye, akeil foka dukdongobuka tabakuka dobik. Anang arye, asukum arye dukdongobuka otam cang keil foka dopnin balamik. Refaya bira, mining dam aulamukce, Yerusalem mutuku dana tam ton, bokuka deiyoknye kibuka talyamuk. ¹⁰Asukum arye dukdonga dobuka deiyoknye bira, Harumaf el mi Yedaya, el aik mining dam, akeil foka tabakuka dukdongobuka dobik. Tonda, sik ap mining dam ara, Hasabneya el mi Hatus ap, el kwit capu ap arye, akeil foka tabakuka dukdongobuka dobik.

¹¹Asukum arye dukdonga dobuka deiyoknye bira, Harim el mi Malkia akeil foka tabakuka dukdongobuka dobik. Tonda sik ap mining dam ara, Paha-Moab el mi Hasub ap, el kwit capu ap arye, akeil foka tabakuka dukdongobuka dobik. Tonda din ning roti dana ati, weik cang aik tonok ton tabakuka dobik.

¹²Asukum arye dukdonga dobuka deiyoknye bira, Halohes el mi Salum ap, el kwit capu ap arye, akeil foka tabakuka dukdongobuka dobik. Anang arye, asukum arye dukdongobuka otam cang keil foka dopnin balamik. Salum bira, mining dam aulamukce, Yerusalem mutuku dana tam ton, bokuka deiyoknye kibuka talyamuk. Elce melibukba el ap el kil mapu ap arye, sik mining dam dipdebuka ulamik touk, acang keil foka winiryuk ning tabakuka dobik.

¹³Atonun lyu mutuku bana ati, bisik bublan botopdeiyamik. Ara, Hanun ap, tonda Zanoah mutuku ulamik ninye ap, sik nirya melipdayikke, abisik bublan winiryuk ning botobik. Tonda abublan dana-dana tam delilamik yo ap, deice tam deililamak yo ap, ensel ap, bisik tirikilongon ning ap, dobikke tirikdongobik. Tonda, abublan deice ara, gat ning besi beton dobuka taplakdeibik. Awiniryuk tabakuka dobik cang keil foka el cang ara, yupa weik empat ratus empat puluh meter (440) ubuk. Asukum ara, domba basam dei eklebuka dolkwetelban bublan bisik awamak.

¹⁴Malye ning ap, domba basam dei ap, eklebuka dolkwetelban bublan nyalamik ning ara, Rekhav el mi Malkia birye bublan winiryuk ning tabakuka memebuk. Malkia bira, Bet-Kerem mutuku talina ati, deiyok kibuka talyamuk. Tonda abublan dana-dana tam delilamik yo ap, deice tam delilamak yo ap, ensel ap, bisik tirikilongon ning ap, dobikke tirikdongobik. Tonda, abublan deice ara, gat ning besi beton bobuka taplakdeibik.

¹⁵Tonda, mek pu wamukak mek kwelbana ati bisik bublan botopdeiyamikba awamak bisik ara, Kolhoze, el mi Salum birye, winiryuk ning tabakuka dobuk. Salum bira, Mispa mutuku talyamuknye ulamuk. Atonun, abublan tirikamik alip tam ara, aik aruma dopdongamik. Tonda, abublan dana-dana tam delilamik yo ap, alip

tam deililamak yo ap, ensel ap, bisik tirikildongon ning ap dobikke tirikdongobik. Tonda, abublan alip tam ara, gat ning besi beton dobuka lamakdongobik. Tonda, Siloam mekwen deiamukak lil kwa ara, akeil foka tabakuka dopdongobik.

Amekwen dam uk, amutuku ninye deiyoknye Raja, el wa ara, ninye arye wiyamikba awamuk. Asukum arye deiyok koubikke, keil foka dopnin balamik ani, minop talak Raja Daud ulamuk asik dam^c bana ati, moropdeiamik yo moromna dam binuka deibik.

¹⁶Salum birye, akeil foka dopnin balamuk ani, sukdongamukak ara, asukum uk Azbuk el mi Nehemia, Bet-Zur mutuku bokuka talyamuknye birye, acang keil foka dukdongobuka dopnin balamuka ani, Daud ap, el mapu ap, dipnop ura weilamikak binuka, dobuka dakdongobuk. Winibukop ura, elcuk dukdongobuka dopnin balamuk ani, ninye arye palyamikba deiyamuk mekwen dam ton dobuk. Tonda, ninye deiyoknye Daud Raja ulamuk talak arye, sik yin talin nang, ilil tenena kum nang ati, sik si erena ati, aik domik dam ara, keil foka dopnin balamika ani, asukum uk binuka deibik.

**Sik Lewi yala nang arye, aning uk dukdongobuka
keil foka winiryuk ning uk dobik yupu**

¹⁷Ura, aning atonun sik Lewi yala nang arye akeil foka uk dukdongobuka dolamik talak ara, Bani el mi Rehum birye, deiyok kiamukba fil dolamik. Tonda, sik mining dam dipdanuka keil foka dona deiyoknye, Hasabya ap, el talyamuk mutuku nang ap, sikce acang keil foka winiryuk ning ton, dukdongobuka dopnin balamik. Hasabya bira, Kehila mutuku dana tam ton bokuka talyamuk. ¹⁸Atonun, sik dam ara, Henadad el mi Binui bira, Kehila mutuku dana tam bokuka talyamuk deiyoknye, el ap el kayapu yuk nang ap, sik nirye arye, aweik cang keil foka winiryuk ning tabakuka dopnin balamik ani, asukum binuka deibik.

¹⁹Atonun, sik dam ara, Yesua el mi Ezer, Mispa mutuku talyamuk deiyoknye ap, el kayapu nang ap arye, acang keil foka winiryuk ning dukdongobuka tabakuka dopnin balamik ani, fin lukdeibikke, dopnin balamik ani, yin talin nang arye, ninye olbana ati, talilamik ning aning-aning nirya, deililamik aik dam bana ati, welebuka ban bisik dam binuka deibik.

²⁰Aning atonun, Zabai el mi Barukh ap el kayapu nang ap arye, asukum arye dipdongobuka akeil foka dopnin balamik ani, Allah el si eren aik fum tam fil dona weik deiyoknye, Imam Helyasib, el aik bublan

^c **3:15** *Daud aik Raja Daud minop talak ulamukak ara, mutuku kon deice ninye arye aik domikba ulamuk. Ati, el aik dam arye koulukuka, Siloam mekwen dam bana ati, moropdeiamik.*

dam binuka deibik. Ninye si Barukh el yupa ara, fia pi dobuka dopnin balamik. ²¹Ninye si Hakos birye deibuknye, Uria el mi Meromot ap, el kayapu nang ap arye, acang keil foka winiryuk ning dopnin balamik ani, Imam Helyasib el aik wekelban bisik bublan dam binuka deibik.

**Sik imam-imam nang, yuk mutuku noutam ulamik nang
nirye arye, afoka uk dukdongobuka dobik yupu**

²²Sik Imam-imam nang aryuk, mining dam aulamne atonun, anang aryuk dukdongobuka dopnin balamik. Ara, Yerusalem mutuku dam ap, Yordan mekin ap ulamik nang arye, akeil foka uk dukdongobuka dopnin balamik. ²³Asukum ara, Benyamin ap, Hasub ap arye, sik mining aik dam dukdongopdana ulamdik touk, wibuka dukdongopdik. Aning atonun, Ananya el mi Maseya ap, el mi Asarya ap sik babye mining asik dam dipdanuka ulamik touk, akeil foka dobuka dukdongobik. ²⁴Ninye si Henadad, el mi Binui birye abatakikak arye dukdongobuka dopnin balamik ani, Asarya el asik dam ulamukak binuka deibuk.

²⁵Tonda, Uzai el mi Palal birye, akeil foka ulamukak arye dukdongobuka dopnin balamik ani, itam ninye deiyok nang, Raja ulamik aik dam ap, bisik kalikna nang bulubuka weklamika dam binuka deibuk. Ninye si Palal birye, dopnin balamik ani, binuka deibukak arye, Paros el mi Pedaya birye, asukum aryuk dukdongobuka dobuk. ²⁶Asukum ara, fia pera kum bukni, mining dam sukumuk mutuku si Ofel mutuku nyalamik mutuku ara, Allah Yahweh^d el aik fum tam fil don nang, sik fil melin nang Ofel mutuku deice ulamik. Ati, Allah Yahweh el aik fil melin nang arye, keteng yangan tam arye mek kwelbana ati, balamik bisik bublan wamukak arye, dukdongobuka akeil foka dopnin balamik ani, binuka deibik. Ara, mek kwelbana ati, balamik bisik bublan botamik dam weik cang aik, el si menara nyabuka domik aik dam binuka deibik.

²⁷Ura, aning nirya winibuka dopnin balamik ani, tuba abatakikak ara, yuk nang arye dukdongobuka dopnin balamik. Asukum ara, Tekoa mutuku nang arye acang keil foka tabakuka dopnin balamik. Ara, akeil foka deice tam weik cang aik

^d 3:26 *Yahweh* – Allah el si koproba ara, ‘Yahweh’ ulule. Allah arye Musa ati, ayupu lakak arye nyabuk (Keluaran 3:14). Ibrani yupu deice arye ahuruf ‘YHWH’ aning uk sekenyake. Ibrani yupu nyanyak ninye arye, ‘Allah el si koproba lakak kum nyaptibye’ tenen, ilil ulule. Ilil ulula ati ara, sikce huruf ‘YHWH’ aning uk sekenyake. Bukni, Allah arye Musa ati, “Kume na si ara, ‘Yahweh’ unune. Asi Yahweh bikmunce asi uk erebuka na ati kinamnululume,” nyabuk. Ibrani kili sal arye huruf YHWH sekenyak bukni, ‘Ahuruf uk sekipyop ura, ayupu nyana ara, walwal upsilyak’ tenen, nunce ‘Yahweh’ sekenyabe. Indonesia Alkitab noutam ara, Allah el si Yahweh kum sekenyake. Sikda, ‘TUHAN’ sekenyake. Bukni, Indonesia Alkitab noutamak nirya, ‘TUHAN’ eipmunyop ura, ‘Ara Allah el si Yahweh sekenyak sukum,’ tenenamululume. Allah el si Yahweh nyana ara, fia teleb uke. Tonda, laka nyana yupu nomor 49 dipdelulume.

el si menara nyabuka domik aik dam arye, dukdongobuka dopnin balamik ani, Ofel mutuku dam antanapdongobuka, domik foka dam binuka deibik.

Yuk fil don nang nirya ati nyabuk yupu

²⁸Tonda, sik imam-imam sik asik dam yuk-yuk mining dam aulamik touk, akeil foka moubuka dopnin balamik. Ara, kuda basam wekelbana ati, botopdeiyamik bisik bublan dam arye dipdongobuka, foka winiryuk ning tabakuka dopnin welyamik. ²⁹Asukum ara, ninye si Imer el mi Zadok birye, acang keil foka el aik dam arye, dukdongobuka domuk. Abinuka dopnin balamuka ani sukdongamukak ara, yuknye ton el si Sekhanya, el mi Semaya birye, dukdongobuka dopnin balamuk. Semaya bira, keteng yangan tam botopdeiyamik bisik bublan dam, kalikina deiyoknye ulamuk.

³⁰Abinuka deibukop ura, Salemya el mi Hananya ap, yuknye ton Zalaf el mi, Hanun ap, sikce aning nirya, tabakuka dopnin balamidik. Zalaf el mapu nirya ara, naku barye deiyamuk bukni, Hanun bira, nakupnye ulamuk. Hanun ap, Hananya ap, keil foka dolamidik arye, dipdongobuka fil dobuknye bira, Berekye el mi Mesulam el asik dam arye, dukdongobuka, keil foka winiryuk ning tabakuka dopnin balamuk.

³¹Asukum ara, ninye si Malkia birye, afoka winiryuk ning tabakuka dopnin balamuk. Malkia bira dekna weik ning, fia teleb gat ning el si ara, emas arye dobuka, yuk ning memena deiyoknye ulamuk. Anye birye acang keil foka dukdongobuka dopnin balamuk ani, Allah si eren aik fum tam, fil dona ati melin nang, sik ulamik aik ap, tonda bona yuk-yuka talibuka deken nang ap, sik ulamik aik ap, anyaik dam keil foka dopnin balamuk. Dopnin balamuk ani, deiyamuk bisik bublan ara, 'Malye ning boyanmak do, teleb ning boyanmak do?' tenen, wibuka dilden bublan^e nyabuka, botopdeiyamik bublan dam binuka deibuk. Abublan si ara, Gerbang Mifkad nyalamik. Abublan dam ara, Malkia birye, keil foka dopnin balamuk ani, binuka deibuk. Afoka mouse dam ara, aik ton domik.

³²Asukum domik aik dam arye dipdongobuka otam keil foka dopnin balamik. Ara, urasin fia teleb gat ning, el si ara emas arye, dobuka memen nang ap, bona yuka-yuka talibuka dekna deiyok nang ap, sik nirye arye akeil foka mouse dam dukdongobuka dopnin balamik ani, domba basam bobuka, wekelbalamik bisik bublan dam binuka deibik.

Nehemia birye, "Yuk ninye arye, 'Winina meme,' nyapnamsiyak ati, moubuka tenipmunce, keil foka donamlume," nyapdeibuk yupu

4 ¹Yuk nang arye, "Israel nang ara, Yerusalem asik keil dikuka deibikke, foka tamubuka dopmake," nyabikba, Sanbalat kekebukce,

^e 3:31 Dilden bublan Ara, Allah el si erena ati boyangalamik domba basam ap, kambing ap, 'Bol malye do, teleb do?' tenen, wibuka dildelamik, 'Telebe,' nyapnop ura, abublan bisik arye bobuka wekelbalamik.

kanye talima fum tam ara, yu weik ubukba, malye kanye bobuk. Yu ubuk ura, “Israel nang anggunda afil kum doptume, anggunda talye nang uka,” nyabuka, nalinmokce, aku tupsuke.

²Tonda el yala nang ap, Samaria mutuku yin deiyok nang ap nirya ati, binuka yupu bobiyukce, el mapu kekenmekak arye nyabuk. “Sik Yahudi nang mikip kum nang anya arye, yata tenebuka afil donmak do? Sikda walwal nang anya arye, Yerusalem asik buru tam keil foka ara, tuba tamubuka teleb ubuka keil deibuka dopting do? Tonda, adobikirye kam ning obuka, Allah el si erena ati, arenamak do? Afil nirya ara fia weik ati, like tonok sum arye, akunum sirya dakuka dopting do? Yerusalem asik ap, keil foka ap, yu nang arye uluplobikce, uku dongamik ning ara, tuba tamubuka teleb kipdeipting do? Kume, kum winiptinge,” nyabuka, nalibuka asipdeyuk.

³Nyabuk talak uk, Amon mutukunye, el si Tobia dam bukmokce, “Sik yatato ning donmak do? Keil deikuka, deipwelepnin bakirye, akeil foka donmaka ara, bai kam mitik ning ton yalirye, afoka yanuka kapliplyop ura, dakuka saknamle,” nyabuka nalinmok. ⁴Nyaprika ati, Nehemia birye, Allah ati morobukce nyabuk. “Nun Ni Koprop Allah, nun morobab ning ara, kekepsilyame. Nun ti malye nyapsikirye, malye kisinyak ning ara, ance sik deice uk deipnalame. Ton mutuku nang arye, yuk mutuku nang ati sirya obuka dakikirye, sik talinyak ning nirya alaprobikirye, abona dobuka, sik mutuku tamubuka bobalamak touk, ance amalye yupu nyasinyak nang ati wenebuka sirya obuka daknalyame.

⁵Ati, ance sik malye unyak ning ara, luba kipmince batakana kume. Tuba tenibuka wenenalyame. Tonda, sik malye wininyak ning ara, lyena kume. Sik malye wininyak ning ara tuba eibuka teninamlyame. Deiyok ara, an aik dam foka donyak nang ati, malye yupu nyaldongosinyak ati nyapne. Ati ance anang sik malye wininyak ning ara, kum namin kipnalyame, naio,” Nehemia birye Allah ati nyabuka morobuk. ⁶Aning akunum morobukop ura, Nehemia ap, sik Israel nang ap arye, fia pi dobuka fil dolamika ati, sik keil foka ara tuba tamubuka, keil deikuka, deipwelepnin biyikce, cang arye dopnin balamika ani, noutam karin ubuk. Tonap dukdongobuka, keil tukwak deipnin welebikba noutam karin aubuk. Aning ara, sik ninye nirya bulubuka mikip arye, dopnin welebig arye winibuk.

⁷Winibukop ura, Sanbalat ap, Tobia ap, sik Arab nang ap, Amon mutuku nang ap, Asdod mutuku nang nirya arye, kekenmekba, yuk nang arye, “Yerusalem asik keil foka ara teleb kibuka donmake, tonda keil foka kin-kin wamuk ning nirya ara, lipsisikuka memeldongonmake,” nyabikba, anang kekebigce, fia yu kanye weik bobik. ⁸Aning kekebigce, sik anang nirya bulubuka wekikce, “Yerusalem binuka warikibirye, afil donyak ninye nirya ara, ikin ning sik nong deice deibibirye, sik ti obuka

sirya dakibirye yakdonoknamabe. Winibibyop ura, sikce afil batakuka bindopnamake,” nyabuka yupu talibik.

⁹Nyabuka yupu talibik bukni, ‘Nun Ni Koproba Allah arye melinamsil’ tenen, Allah ati morobupu. Tonda, ‘Sik anang olyasicak’ tenen, keteng noutam babye, lukunyan talak babye kalikin nang ton wipdeibupu.

¹⁰Anoutam talak ara, Yehuda tam nang arye nyabik. “Nun fil don nang ara, fil weik dobupa ati ara, nun mikip ara, akunum mitang kipnin banmasile. Tonda, nun fil donak ara, min arye uluplobik keil telebroba ning, fia weik ubuka ati, nunce afoka ara fil dobuka sirya kum daktibye,” nyabik.

¹¹Tonda, nun olan nang arye, nyapsike. “Sik Yahudi nang ara, walwal nang anya arye, bikuka kum eipmasice talak aryuk, nunce sik noutamak aunmakibuk duknubuka wekiyop ura, sik nirya obuka sirya dapnamabe. Afil donyak ning nirya bataknamake,” nyapsike. ¹²Yehuda nang bukni, ayupu nyapsik nang, dam ulamik nang arye, like tagu barye sum arye, nun dam nyalyangalamsik. “Sik opnamsiyak nang ara, amutuku noutam nirya unyaka ati, dan sukum bitumba, kum opsiting do, kume. Anggun binamlumak nirya, yakirye opnamsiyake,” nyalamik.

¹³Ati, ‘Opsicak’ tenen, na arye Yahudi yala nang nirya, anggun deipgerepdop nang ulamik touk, keil foka amutam bukni, daklobikba, tuba ubukak nirya kintinipdeipsirye, ‘Amalye nang asukum arye wekelyanuka opsicak’ tenen, ‘Fia moubuka kalikinamlulume,’ nyapdeipse. Anyapse nang nirya kintinibik ning ara, sik yin ap, mal ap, parang ya ap, yo tace ap, dobuka kintinibikce, kaliklamik. Tonda, kelapye wirikdeiyamikce, kaliklamik.

¹⁴Aning nirya moubuka dipdebuka kel biksakarye, tikukapsirye, sik Yahudi ninye deiyok talyamik nang ap, sik weik-weik nang ap, sik talye nang nirya ap ati nyapse. “Anggunda sik yuk nang ati, ilil una kume. Allah atibuk teninamlulume. Allah ara, el mikip fia weik ulirye, ninye arye winipmanto kum fil donanye binya arye, el tibuk tenipmunye ura, ilil kum unamsile. Tonda, ‘Elcuk melinamsil’ tenen, tenipbibirye, anggun yala nang ap, anggun tam nang ap, anggun mapu ap, anggun kil mapu ap, anggun kilapu ap, anggun asik nang ap ati, aning-aning nirya ara, fia pi dobuka unamlulume. Anggun malye nang olana ati, kintinipdeipnamlume,” nyapse.

¹⁵Nun nirya kintinibububa, yuk nang arye, “Kume, Yahudi yala nang arye, akunum kel bikmasiyake. ‘Sik opnamabe,’ tenebupe ning ara, akunum kekebikce, akunum kintinipmake. Tonda, Allah arye nun tenebupe ning ara, akunum bisik seksuke,” nyabuka lak nyalbiyikba, nun olan nang kekebik. Akunum kekebikba, nun Yahudi yala nang nirye arye, akeil foka lipsisikuka dona ati, keil deikuka, dikdanin welelamupu. Nun fil yuk-yuk awamuk touk, keil deikuka, dikdanin welelamupu.

¹⁶ Asum aryuk deiyok koububurye, dotalak nirya ara, na mapu nirya bokeipsiba, ton tam nang ton fil donmek. Adip aryuk, ton tam nang ara bokuka yin ap, mal ap, yo tace ap, ting ap, kelapye ap dobukabice, nun olan nang yangana ati kalikinmek. Yin talina deiyok nang arye, Yahudi yala ninye keil foka dolamik nang fil donmekak, aminyan tam yanuka tikik. ¹⁷ Weik keil foka dona ati, keil yangapdeipna arye, dopnin welena ati, keil ap, yuk don ning ap, bobuka boyangalamik nang ara, yin ton tam taruk bopman dib aryuk, ton tam taruk ara, keil boyana arye dolamik.

¹⁸ Aning atonun, keil foka dolamik nang nirye arye, sik parang ya deiyating noutamak kikipdongobuka fil dolamik. Bukni, ‘Olbinuyap’ tenenamak tenen, pong-pong an ning, talibuka pong-pong nyanamoknye bira, na dam uk unmok. ¹⁹ Na arye, sik amutuku talyamika deiyok nang ap, yuk weik-weik nang ap, tonda talye daulamik nang ati, nyapse. “Adonamap fil ara fia weike. Tonda, asukum arye keil foka dona ati, keil yangabuka, deipnin welebirye, fil dopnin balamipya ani, otam binuka donamap talak ara, anoutam ara pera weik ati, mining dam fil kum donamaba ati, ‘Lopdeipmabye noutam arye, wekuka opseicak’ tenen ati, kanye muopnamlulume.

²⁰ Pong-pong an ning, el si terompet pong-pong nyabikiba, anggunce lelim kekepmunyop ura, ‘Nun olan nang akunum yanganmake’ tenen, anggun nirya minop bulupmunce, nun dam yanamlulume. Nun Ni Koproba Allah arye, nun ti melipsiliba, nun olan nang ati obuka sirya daknamabe,” nyapse.

²¹ Ati, nun afil donyap nang ara, tonoknye babye kum batakupu bukni, ninye yupa nirya bokuburye, ton tam nang ara yin ap, yo tace ap, uk bobuka kaliklamik. Ton tam nang ara, keil foka fil uk dolamupu. Ara, keteng panalyangan talak arye diprongobuka, keteng wekelban talak babye, anirye kurya tiklamuk talak babye ara, anoutam nirya fil dona uk ulamupu. ²² Atalak babye, na arye aulamik nang nirya ati nyapse. “Anggun fil talibuka dolulum nang ap, anggun melin nang ap, yuk mutuku kum malbinamlulume. Yerusalem mutuku uk malbinamlulume. Winipmunyeba, lukunyan talak ara, anggunce nun ti kalikinamsulume. Winipmamunya bereklyop ura, keteng duk-duk noutam nirya tamubuka, keil foka fil dolyanamlulume,” nyapdeipse.

²³ Ura, afil dolamupu talak nirya ara, na bidamang ap, na yala nang ap, na amutam fil dolamik nang ap, tonda na ap ulamuburye, na amutam kalikin nang ap, nun nirya ongolamupu ongon butum aling ara, kum kwiribuka bataklamupu. Abutum aling ongotman dib aryuk, tuba fil dopnin balamupu. Tonda, nun nirye arye, yin bobuka balamupu. Tonok talak babye kum bataklamupu. Mek kwelbinun talak babye, nun yin talipmancuk kwelamupu.

Ura Yerusalem mutuku bukni, weik cang keil foka antanapdongobuka, dolamupu nang ara, like lima puluh dua (52) sum deice arye, keil

yangabuka, deipnin welelamupurye, akeil foka don fil ara, sirya dakupu. Atalak ara, wala si nyalamupu ara, Elul bukni, tanggal 25 deice arye sirya dakupu (ara Oktober 25).

Winibububa, nun dana-dana tam nirya ulamik olan nang, yala-yala yuk nang nirya ara, aning kekebikop ura, ilil weik ubuk. Tonda, sik ilil kum asa arye, ‘Nun dem aryuk Israel ninye obuka sirya daktibye,’ tenelamik ning ara batakik. Aning deiyok ara, sik ayuk mutuku nang nirye arye, ‘Se dipkoprop sik Israel ninye weik mambul fil donmaka ani, sirya daknamaka ara, sik Ni Koprop Allah tenelamuk deice arye afil dobik. Sik dem aryuk kume,’ tenen, bikikce, ilil weik ubuk.

**Nehemia birye Yehuda yala ninye, bona utotoa kum
ninye, sik patalamuk ning ati, melilamuk yupu**

5 ¹Ura ouku fia weik daulamikce, Yahudi yala ninye kanye imun fia weik ulamuk. Ara sal ap, kilapu ap, akunum bulubikce ‘Se,’ tenebuka, sik neika ulamik ninye ati derelalamik. ²Utenebuka derelalameka deice arye nyalamik. “Se, nun mapu ap, nun kil mapu ap, fia weik usinyaka anya arye, din ning gandum aripsitingba diptipya deice arye, kam unamabe. Kumop ura, kume,” nyalamik.

³Aning atonun, ton nang arye nyalamik. “Kume din patan bukupa ati, na ara na wa wibuka koulamse wa tuku ayala-ayala nirya ap, na aik ap, kintinipdeibuka deknirye aning deice arye gandum deknamne. Winipniba nun nirya dinamabe. Winibibyop ura, din patan deice arye kum dipnamabe,” nyalamik. ⁴Ton yuk nang ara nyalamik. “Nunda yuk nang uang yo bok ton tia ati dopropmapya ani, tuba aminyan tamubuka punupnamabe. Ayo bok ara, Nun ni koproba Raja arebibiba elce wa win tuku ap, anggur tapu duk wa win tuku ap ati, “Pajak yo bok ara, winibuka arenamnulume,” nyapsilye ning ara, nunce areptibye,” nyalamik.

⁵“Ati ara, nunda Yahudi yala nang kum ati do? Atonun, nun mapu ap, yuk Yahudi yala nang sik mapu ap ara, atonun kum unyaka ati do? Nun kanye ara, nun mapu nirya ara, atotouk unyak bukni, nun mapu ara, yuk nang ati dekdombupa, anang arye nun mapu nong deice ikin ning weik delinyakce, sik nong deice ikin fil arukunyake. Yo bok ton dekna kum aryuk, talye fil uk arukunyake.

Tonda nun kil mapu, wel teleb ubuka kenyak kil mapu weike, nunce dekamupa deice arye yuk nang ati, fil melin kilapu kibuka unyake. Bukni, nunda ninye asik nang atonun kipsika deice arye, nun mikip fia kum ati, yata wiriptibye do? Nun wa win tuku nirya ara, yuk nang sik uang yo bok deice arye akunum dekuka doprobikce, talinyak ati ara, yata ning deice arye dektibirye, nun kil mapu tuba tamubuka doproptibye do?” nyabuka weik arye engelamik.

⁶Sik aninye arye patalamuk ning ati, malye kanye bobuka nyalamik ning ara, na akunum kekepsirye, yu upnukba weik arye derepse. ⁷Winibuka derepsirye, nyapse. “Se, anggun deiyok talibuka, ‘Winipnuyabe,’ nyan nang ap, amutuku taliluluma deiyok nang ap ati, weik arye derepsine. Anggunda, anggun kwit capu koproba ati nun like tenebuka yu kanye bolalumce, amutuku nang arye, uang yo bok morosinyak talak ara, anggun deiyok nang ati, nyalulume. ‘Aripnusiya ning ara, tamubuka aripnamsulum bukni, yuk ning tonap weik arye tabakuka arenamsulume,’ nyalulume. Nyaluluma deice arye, fia malye ululume. Ati ara, anggun nirya bulupmunba, yupu talibuka lipsisiknamabe,” nyapse.

⁸Na arye ayupu tonap dukdongobuka mikip asa arye nyapse. “Minop talak ara, yuk pera mutuku ninye, Yahudi yala kum nang arye, nun mapu weik dekuka bobinamsik bukni, winitalak ara, nunce nun dam aupmasintouk, nun mapu tuba tamubuka dekuka boyangalamupu. Bukni, anggunda Yahudi yala ninye ululum bukni, anggun bidamang arye anggun mapu ati, dekelulume. Winimunya ara, yata deiyok ati do? Dan talak arye, tuba tamubuka nun mapu dekdopnamap do?” nyabuka wenepse. Nyabuka wenepsiba sik amutuku noutam talina deiyok nang ap, ‘Winipnuyabe,’ nyan deiyok nang ap arye, yupu tamubuka nyapmanto kum ubukce, sik alye ubuk ati, yupu tunimabuka bukik.

⁹Na arye ayupu ton dukdongobuka nyapse. “Anggun amutuku umunce, fil domunye ning nirya ara, fia dipkoprop ton kum winilulume. Malye uk winilulume! Ati anggun kam unamlum talak nirya ara, adib aryuk Allah ati ilil tenebuka unamlulume. Aning kum winipmunyop ura, nun mal olan nang arye tenenamsiyaka ara, ‘Allah ara, kum ulule,’ tenebikirye, ‘Sik Yahudi yala ninye ara, talye unyake’ tenen, nalinamsiyake.

¹⁰Tonda, na Nehemia ap, na kwit capu ap, na mapu ap nun nirye arye, sik yuk Yahudi yala ninye, sik melina ati, uang yo bok ap, gandum ap, tia talak ati arenyabe. Bukni, nunce auang yo bok dolonyak ninye ati, ‘Weik arye tabakuka arenamsulume,’ kum nyanyabe. Ati ara, anggun amutuku deiyok talibuka ululum nang arye, sik yuk Yahudi yala ninye anggun amutam unyak ninye ati, ‘Tia ati doproplum uang yo bok tamubuka arenamsulum talak ara, weik arye tonap tabakuka arenamsulume,’ nyaplum ning ara, adib aryuk bataklulume.

¹¹Aning atonun, sik aninye nirya babye minop talak arye anggun kwit capu ning doproplumce, ‘Ila tuba tamubuka punupnamsin ja,’ nyaltakamunye ning nirya babye, adib aryuk punupmunce, kililtakanamlulume. Ara, uang yo bok do, gandum do, anggur tapu duk do, zaitun yo duk mek do, aning nirya ara tuba tamubuka arenamlulume. Tonda, sik wa win tuku ap, anggur tapu wa winak ap, zaitun yo duk mek wa winak ap, sik aik nirya ap ara, adib aryuk tamubuka arenamlume,” nyapse.

¹²Nyapse ning ati, sik amutuku noutamak talibuka ulamika deiyok nang arye, “Yo telebe. Anyapmasilam ning ara, wininamabe. Tonda, nunce dukdongobuka nyapnamabe. Winibibirye, sik talyamik ning nirya ara, tuba tamubuka arenamabe. Winibiyop ura, nunce sik yuk Yehuda yala ninye ati, ‘Tonap tabakuka arenamsulume,’ nyabuka kum moronamabe,” nyabik. Nyabikop ura, na arye sik imam nang ap, amutuku talibuka ulamika deiyok nang ap, ‘Winipnuyabe,’ nyan deiyok nang ap ati, “Yalulume,” nyapsirye, sik amutuku noutam weik ninye deiyok nang ara, arup arye, ‘Winipnuyabe,’ nyapmangu ning ara, ‘Dipkoprop winipnamak’ tenen, “Nyalin yupu deice arye lak nyapdeipnululume,” nyapse.

¹³Asum aryuk, na ongolamse butum aling deice talibuka bolombolom apsiba, na butum aling deice wamuk butbuta sakuk. Winipsirye ayupu ton nyapse. “Yata nang do nirya, Allah arye, ‘Aninye ara, na tenen ninye upnamak’ tenen, wibuka deiamsuk ninye noutam ara, anggun asum nyalinmanulum yupu, kekebuka kum dopropline bira, abutbuta sakmo atonun, Allah arye anang nirya batakname. ‘Aning ara, winibuka unamabe,’ nyanmanulum yupu, kum kekenyak nang ara, sik aik ap, sikce talinyak ning ap nirya ara, Allah arye kum daneipname!” nyapse.

Nyapsiba, awekmek ninye nirya kekebikce, ‘E, dipkoprop yupu nyanmasilama ati, anyanmasilam touk wininamap’ tenen, ‘Dipkoprop akunuma’ tenen, “Amin,” nyabik. “Dipkoprop akunuma,” nyapmekce, Allah Yahweh el si uk erebik. Amutuku noutamak ulamikce “Wininamabe,” nyapmek touk, dipkoprop kekebikce, asum arye diprongobuka dotalak nirya winilamik.

Nehemia el talima mitang ubuk yupu

¹⁴Na ara, ‘Yehuda yala ninye anggun deiyoknye Gubernur upnamle’ tenen, wipdeiyamnik talak ara, Persia mutuku ninye deiyoknye, Raja Artasasta el ulamuka noutamak uk keteng tamun ara dua puluh (20) arye dipdongobuka, tiga puluh dua (32) tahun upse. Tonda, aketeng tamun dua belas (12) tahun noutamak nirya ara, na ap, na kwit capu yuk nang ap arye, amutuku talyamuk ninye deiyoknye birye, “Din ning bokuka arenamnulume,” nyapdeiamuk ning ara, amutuku ulamik ninye arye arelamik bukni, nunce adin ning ayala-yala nirya ara, tonok ning babye dobuka kum dilamupu.

¹⁵Na weiknye Gubernur min kum wipdeiyamnik talak ara, yuk weik ninye deiyok nang amutuku talyamik. Aninye deiyok nang arye, amutuku ulamik ninye nirya ati, sik nong deice ikin weik ning delilamikce, “Sik uang perak yupa tonok keba obarye, empat puluh (40) arenamsulume,” nyabuka ubula dolamik. Tonda, “Din ning aning-aning nirya ap, anggur mek ap tabakuka arenamsulume,” nyabuka ubula dolamik. Na ara,

Gubernur min kum ulamse talak ara, amutuku talibuka ulamik weik ninye deiyok nang ap, sik amutam fil melibuka dolamik nang, pegawai nang ap arye, winilamik bukni, na ara aning atonun ton fia kum winilamse. Aning nirya kum winilamsa ara, talye ati kume. Teleb ubuka ulamse deiyok ara, na Ni Koproba Allah ati, fia lilil tenelamse ati ara, ato ning malye winin ning ton fia kum winilamse.

¹⁶Ato malye un ning, fia ton kum winilamse bukni, ‘Na ara cang weik keil foka don fil dem uk dolamipya ani, sirya daknamabe’ tenen, fia pi dobuka fil dolamse. Atalak noutamak nirya ara, na arye tuku mitiktonun babye tonok ton fia kum dololamse. Aning atonun, na amutam fil melin nang babye, tuku mitiktonun babye tonok ton fia kum dololamik. Na ap, na kwit capu ap arye, ‘Nunda amutuku unmaba deiyok ara, acang keil foka fil donamap’ tenen, yanmabe. Yuk deiyok ati kume. Ati, ‘Afil uk fia pi dobuka donamap’ tenen, ulamupu.

¹⁷Na din ning kintinipdeibuka, din yolana deice ara, Yahudi yala nang ap, amutuku weik ninye deiyok nang ap, yupa weik 150 nang wekuka neika din dilamupu. Aning atonun, nun dana-dana tam ulamik ninye talyamik ninye deiyok nang ap, boyangalamikba, nun ap neika din dilamupu. Na arye adin ning aning-aning nirya kintinililamsiba, sik anang nirya arye din dilamik.

¹⁸Asum-asum nirya, na amutam fil melin nang arye, din ning kintinibuka deililamik ning ara ani. Sapi basam tonok ap, domba basam nong fia teleb ning naku barye ap, dipmanto maka ayala-yala nirya weik ap, kintinibuka boyangalamik.

Tonda, yupa weik tagu barye sum akunum kipnop ura, anggur mek aning-aning nirya weik arye, kwebuka boyangalamik. Winibuka boyangalamik bukni, na arye Gubenur ati moropmanto ning ara, ‘Din ning ayala-yala nirya tabakuka boyanamnulume,’ nyabuka kum morolamse. Sikce talye arye arilamnik ning uk dobuka dilamupu. Yuk ning ap tabakuka kum morolamsa deiyok ara, ani. Sik amutuku ulamik ninye ara, ikin kanye bobuka ulamikba, ikin kanye bobuka ulamik ning ara, na akunum kel bikamsa ati, yuk yala ning ton fia kum morolamse.

¹⁹Na ara, winibuka diksukumuk ulamse ati ara, na Ni Koprop Allah, ‘Ance na ti kanye deipnutum’ tenen, moropkine. Ara, na arye amutuku ulamik ninye nirya ati, melibuka ulamse ning ara, na ni Allah ance tuba tenenamnilame. Winilamnimize, na ti fia melinamnimize. Nehemia birye nyabuk.

Sik yuk nang arye, Nehemia biti yu ubukba, “Keil foka dopmalum ning ara, batakulume,” nyabik yupu

6 ¹Ura, yuk ninye arye, “Yerusalem asik keil foka akunum dopmake,” nyabuka lak nyanmekba, yuk nang sik si Sanbalat ap, Tabia ap,

tonda Arab mutukunye el si Gesyem ap, tonda, 'Israel yala ninye nun lik,' tenebuka olalamik nang, yuk nang ap, sik nirye arye kekenmekba, nun ti, "Yerusalem mutuku weik cang keil foka akunum dobuka sirya dakmake," nyabuka lak nyabikba kekebikce, yu ubuk. Atalak ara, nunce apala keil foka nirya dobuka sirya dakmaburye, bisik bublan nirya tirikuka kintinipdeibupu bukni, winitalak ara, nunce bublan akunum tirikupu bukni, bublan talin ning el si ara, ensel arye min kum tirikupu.

²Ati na ara, Sanbalat ap, Gesyem ap, sikce ninye ton dopbuka deiplirye, "Anda nun dam yaminba, nun ap bulubuka yupu talipnamaba ati, tonok mitik mutuku lyu ak, el si ara Ono mutuku yanamlyame," nyapdikba, yuk nang arye yanuka nyapnike. Nyapnik bukni, dipkoprop na kel bikamsa ara, sikce na ti, 'Anye bira obibyeba, el nong ara kum danamle,' tenepnike. Aning ara, akunum kel biksa ati, kum bisirye yupu uk nyapdeipse. ³Ninye dopdeipsirye, nyapse. "Anang dam bimince, ayupu nyapnulyame. 'Winitalak, na ara weik manbul fil donuna anya arye, anggun yupu talipnamalumak ara, kum yanamane. Aning ara talye ati kum nyapne. 'Afil batakuka yupu talinak yanyop ura, fil dobuka sirya kum daknyak' tenen, kum yanamane,' nyabuka laka nyalbinulame," nyapse.

⁴Winibuka yupu nyalilamnika ara, fia weik like dum barye deice arye surat sekelilamnik touk, na arye tamubuka minopce nyalilamse touk, ayupu uk tamubuka nyalilamse. ⁵Sanbalat birye asurat pamu barye sum sekeibuk ning ara, el melinanye birye asurat boyanuka aripnuk. Sanbalat el melinanye birye bopmok surat ara, kum kitipdongobmokce, asurat bopmokak eipse. ⁶Asekne ning noutam ara, Sanbalat birye sekuka liamuk yupu ara ani. Amutuku noutam unyak ninye nirye arye, anggun Israel ninye ati nyasinyak yupu ara, na akunum kekenune. Na ka Gesyem birye, 'Yo, sik aninye arye nyanyak yupu ara, dib nyanyake,' nyapnuka ara, nyapnukine.

Ara, an ap, an kwit capu sik Yahudi yala ninye ap, amutuku unyak ninye ati, yu kanye uk tenibuka ulyama anya arye, amutuku talina deiyok nang ati, 'Obuka sirya daknamabe' tenen, winipdenamsulume. Ati ara, Nehemia ap, el kwit capu nirya ap arye, 'Nun olan nang arye, weik asik Yerusalem yanuka weksicak' tenen, 'Amutuku antanapdongobuka, cang keil foka donmake,' nyakinyake. Aning uk kum bukni, ayupu ton nyakinyake. "Kume, Nehemia elda, 'Israel yala nang, sik ninye deiyoknye unamne' tenen, kintinipmale," tenebuka nyakinyake. Tonda ayupu nyakinyake.

⁷"Aning ara, utenepmala ati, Allah yupu lak nyan nang nabi-nabi nang arye, 'Nehemia nun ninye deiyoknye unamsile, nyabuka, lak nyalbinamak' tenen, nabi-nabi nang wipdeipmale," nyakinyake. Tonda, "Nehemia birye, 'Yerusalem mutuku noutam ara, ninye deiyoknye Raja

akunum aulule,' nyaliba, amutuku ninye arye kekenyake," nyakinyake. Ati anggun nirya nun dam yamunyop ura, ayupu moubuka talipnamabe. Sanbalat birye asurat deice nyabuka sekeipnukba yinipse. ⁸Nyabuka sekeipnuk bukni, na arye ayupu ara tuba tamubuka yupu nyapse. "Kume anggun nirye arye nyasululum yupu ara, nunce dipkoprop kum wininyabe. Anggun nirya ara, tilila yupu deice aryuk nyalulume. Anggunce nyalulum yupu ara, dipkoprop kum ulule." Ayupu nyapse ning ara, sik dam yupu tamubuka dopdeipse.

⁹Na Nehemia birye utenepse ning ara ani. Sanbalat ap, el kayapu nang ap arye utenenyake. 'Sik Israel ninye ara, nun yupu kekebikirye, ilil weik upliba, sik mikip ara, mitang asa ubicop ura, afil donyak ning ara bataknamak' tenen, winipdese. Bukni, na arye aninye ati, ilil kum tenepse. Nun ni Allah ati moropsirye nyapse. "Na ni Allah ance na ti mikip aripniminba, fil teleb ubuka donamne," nyabuka moropse.

¹⁰Atalak ara, na arye ninye si Metabel birye deibuknye el si Delaya el mi Semaya el aik bise. Winibuka bise ning ara, el kum eipmanukce el aik uk bukmokak bise. El aik bise ura, elce nyapnuk. "Yaminye ura nun bitinye Nun Ni Koproba Allah Yahweh el si eren aik fum tam uk dungnulbinaname," nyapnuk. "Winipnimirye bisik bublan nirya tirikdongobuka duknupnaname. Tirikdongopnimnyop ura, 'Nehemia opnamap' tenen, yanamak nang ara, lukunyan noutam uk yanamaka anya arye, 'Alukunyan noutam arye yanuka opkicak' tenen, nyapkine," nyapnuk.

¹¹Nyapnuk bukni, na arye anye Semaya biti tamubuka nyapse. "Kume na ara, ninye ati ilil upniliba, bai kum sakuka binamne. Na ara anang atonun fia kum unune. Ati, Nun Ni Koprop Allah Yahweh el si eren aik fum tam fia kum wekuka duknupnamne. Ara, 'Yuk nang arye na opnicak' tenen, dipkoprop fia kum duknupnamne," nyapse.

¹²Semaya birye nyapnuk yupu kekepsirye, kel bikse. 'Gume anye birye nyapmanil yupu ara, elcuk tenibuka kum nyapmanile. Tonda Allah arye, anye biti, "Ayupu bobuka Nehemia dam lak nyalbinulame," kum nyapdeibuk. Ayupu nyapnuk ning nirya ara, sik yuk nang Sanbalat ap, el kwit Tobia ap, sik kayapu ap arye, 'Ayupu nyapminba, uang yo bok aripnamkiyabe,' nyabika deice arye, tilila yupu uk yanuka nyapmanile. Ati Semaya birye na ti talye minin yupu deice arye, na dam yanuka nyapdeipmanile,' tenepsirye kel bikse.

¹³Sik anang Sanbalat ap, Tobia ap arye, tenepmarik ning ara ani. Sikce na ti aning winipnimiba, el ilil upliba, Allah el si eren aik dungnulbilyop ura, malye winin ning wininamle. Amalye winin ning akunum winiplyop ura, nunce yuk ninye kekenak ati, 'Nehemia bira, dungnulbinmala ara, fia malye upnamle,' nyabibyeba, kekebikirye, dib tenebicop ura, 'Nehemia bira nun like,' nyanamake. Sik anang bitinye arye, 'Anye bira malye kipdeipnam' tenen nyanmanirike. Utenepsirye kel bikse.

¹⁴Aning kel biksa ati, na arye na ni Allah ati moropsirye nyapse. “Na Ni Koprop Allah, sik anang Sanbalat ap, Tobia ap, sikce na ti, ‘Malye winiptue’ tenen, winipnirik ning ara, an akunum kel biknulume. Ati, ance tenilaminya ani, sik anang ati wenepnalame. Aning atonun, tonok kil ton el si ara, nabi Noaja ap, yuk malye wininyak nabi-nabi nang ap arye, malye yupu nyaninyak ning ara, ance tenilaminya ani, sik anang ati wenepnalame. Anang arye na ti, ‘Ayupu nyabibya deice arye el ilil upnamle’ tenen, yupu nyaninyak ninye nirya ara, ance wenepnalame,” nyabuka Allah ati moropse.

**Weik cang keil foka akunum dobuka sirya
dakdongobik ati nyabuk yupu**

¹⁵Ura, cang keil foka antanapdongobuka dolamupu talak ara, yupa weik lima puluh dua (52) sum deice arye, akeil foka uluplomik ning tuba tamubuka dolamupu. Dolamupu ani, wala si bulan Elul nyalamupu wala, tanggal 25 deice arye akunum sirya dakupu. ¹⁶Akunum dobuka sirya dakupop ura, sik amutuku noutam ulamikce, nun ti, ‘Lik,’ tenebuka mal pilamsik nang nirya ara, aning kekebikce ilil ubukba, ‘Nunda sik ap urasin kum dildanamabe’ tenen, duknuprobik. Min yuma talak ara, malye tenebuka, mikip weik ubuka, ilil kum asa ulamik bukni, akeil foka dobuka sirya dakupu talak ara, ilil ubuka ati, talye kanye bobuka, nimalye asa ulamik. Ara, amutuku ninye arye tenebik ning ara, ‘Se, aweik cang keil foka nirya ara, sikcuk kum sirya daktinge. Allah el mikip deice arye melibukba, minop sirya dakmake’ tenen, sik ilil ubuk.

¹⁷Atalak noutam nirya ara, sik Yahudi yala ninye talibuka “Wininamabe,” nyalamik nang nirye arye, surat sekuka, Tobia dam dolkwetelamikce ulamik. Aning atonun, Tobia birye surat sekuka sik dam dolkwetelamukce, ulamuk. ¹⁸Atalak noutam ara, Yahudi yala ninye weik arye Tobia biti, ‘Nun deiyoknye atonun usulule,’ tenelamik. Utenelamik deiyok ara, sik yala weiknye el si, Arah birye deibuk mi, el si Sekanya birye deibuk kilmu ara, Tobia dobuka ati, ‘Elda weiknye ulule,’ tenelamik. Aning atonun, Tobia birye deibuk mi Yohanan birye dobuk kil ara, talye kil kume.

Ara, ‘Nun yalanye Berekia birye deibuknye el si Mesulam bira, Tobia birye Mesulam el kil dobuka ati, weik mambulnye ulule,’ tenelamik. Aning nirya ara, aninye nirye arye Tobia biti, ‘Ance nyanamsilam yupu nirya ara, moubuka kekepnamabe,’ nyabuka nyalin yupu deice arye, nyapdeiyamik.

¹⁹Tonda, Tobia birye na ti, tuba surat sekuka dolkwetelamnuk ning ara, ‘El babye ilil upnamle,’ tenyamnukce, asurat sekuka na dam dolkwetelamnukce. Tonda, sik Yahudi yala ninye nirye arye, ‘Tobia biti el si teleb kipdeiptibye’ tenen, tuba-tuba na dam yangalamikce, elce teleb

ulamuk ning ati, lak nyalamnik. Ton yuk ning ara, na arye nyapdeiyamse ning nirya ati, sikce bobuka Tobia dam tamubuka lak nyalbalamik.

**Yerusalem cang keil foka dobuka sirya dakik
ura, Nehemia birye winibuk yupu**

7 ¹Ura, Yerusalem mutuku antanapdongobuka domupu cang keil foka akunum sirya dakupop ura, na Nehemia birye winipse. Keil foka bublan ati, bublan memebuburye, na arye nyapdeipsiba, abublan ara bisik bublan memebuka tirikik. Winipsirye, sik bisik bublan dam kalikna deiyok nang ap, sik Allah yupu mot sena deiyok nang ap, tonda Allah el si eren aik fum tam fil dona deiyok nang, sik melin nang, Lewi yala nang ap, wipdeipse.

²Tonda, 'Yerusalem mutuku nirya kalikuka dinamle' tenen, na weit koproba Hanani wipdeipsiba, kalikna deiyoknye kibuk. Tonda, el melina ati, yuknye ton, el si Hananiah ton wipdeipse. Anye bira, cang keil foka antanapdongobuka dolamikba, oldan nang kum yanmanto asik kalikna deiyoknye biti, 'Benteng panglima, nyalamik atonun unamle' tenen, wipdeipsiba, na weit koproba ati melilamuke.

Ura Hananiah wipdeipsa deiyok ara ani. Anye bira, Nun ni Koprop Allah ati, fia dib tenelamukce, Allah ati, 'Elda fia mambule,' tenelamukce, ilil ulamukba, dipkoprop diksukumnye ulamuk ati, wipdeipse. Yuk nang ara, mitik teleb ulamikce, Allah ati dib tenelamik bukni, elda fia dipkoprop dib tenebuka telebnye ulamuk. Ati el ap, na weit koproba ap arye, Yerusalem mutuku kalikna deiyok nang ulamdik.

³Ati, na arye sik ti nyapse. "Yerusalem mutuku aik wekelbana ati, winiryuk memebik bisik bublan ara, keteng kum deipmalirye bupu kum piriptye talak ara, bublan kukultakna meme. Keteng deiplirye, bupu piriptye talak arye, abublan kukulinamlulume. Winipmamunya ani, akunum iniplyop ura, tuba tamubuka bublan tirikilongonamlulume. Ara, sik abublan kalikin nang arye sik tuba kalikinmakce talak ara, anang aryuk abublan tirikdongobikirye, bisik kin-kin botopdeiyamika arye, besi arye dongopdongobuka tirikilongonamake.

Ara, kanam inipnin banmalye talak arye tirikinamake. Tonda, Yerusalem mutuku unyak ninye sik kaliknak atibuk, ninye wibuka kintinipdeipnamlume. Ara, anggun aik dam bisik bublan ap, keil foka dobuka botopdeiyamupu bublan ap, yuk bisik bublan dam kalikinamakak ap ati, kintinipdeipnamlume," nyapse.

**Yuk mutuku nang arye bobinamikba, daulamika ani, tuba
tamubuka sik mutuku yayik ninye, sik si sekeibik yupu**

⁴Pala weik mutuku, weik asik Yerusalem ara, lo weik aubuk bukni, amutuku ulamik ninye ara mitik uka. Aning atonun, ninye un aik babye,

minop talak arye uluplomik ning ara, tuba tonap weik arye tamubuka kum dolamik. ⁵Ati ara, Allah arye na ti, 'Amutuku unyak ninye nirya bulupdeipnamle,' tenepnuka ati, aninye ap, amutuku talibuka ukirye, 'Winipnuyabe,' nyanyak deiyok nang ap, tonda amutuku weik ninye deiyok nang, sik amutam fil melin nang ap nirya ebuka bulupdeipnyop ura, 'Yata wiribuka unyak do? Sik ni birye dipdongobuka, el mapu silip aunyak atonun nuknamne,' tenepse.

Minop deiyok kouna ara, sik apu yapu minop dorupnin yangalamik nang arye nukuka, sekelilamik buku deice arye eibuka yinipse. Tonda, yuk mutuku nang arye bobinamikba, otam binuka ulamik bukni, tamubuka yayik ninye nirya ati, nukuka sekiyamik ning babye, adeice uk eipsirye yinipse. Abuku noutamak eipse ning ara, ani.

⁶Anoutamak arye ninye weik tam nirya ara, Babel mutuku nang arye bobinamikba, wangamne nang atonun ulamik ani, Babel mutuku batakuka, sik mutuku tamubuka yayikce, Yerusalem mutuku ap, Yehuda tam ap, sik mince ulamik mutuku uk, yanuka ulamik ninye nirya ara ani. Ara, minop talak Babel mutuku ninye deiyoknye Nebukadnesar birye, aninye bobuka Babel mutuku bobinamikba, daulamik ninye nirya ati nyapne.

⁷Yerusalem mutuku tamubuka yangalamik talak ara, sik deiyok talibuka ulamik nang ara ani. Sik si ara Zerubabel ap, Yesua ap, Nehemia ap, Asarya ap, Ramya ap, Nahamani ap, Mordekai ap, Bilsan ap, Misperet ap, Bikwai ap, Nehum ap, Bahana ap winibuka.

⁸Paros elce deibukba dadeipdanin biyik ninye yupa weik 2172 ninye deiyamuk nang ara Yerusalem mutuku tamubuka yayik.

⁹Sefaca birye deibukba dadeipdanin biyik ninye yupa weik 372 deiyamuk nang ara, Yerusalem mutuku tamubuka yayik.

¹⁰Arah birye deibukba dadeipdanin biyik ninye, yupa weik 652 deiyamuk nang ara, Yerusalem mutuku tamubuka yayik.

¹¹Tonda Pahat-Moab ap, Yosua ap, Yoab ap, sik winilye nang arye deiamik ninye yupa fia weik 2818 nang ara, Yerusalem mutuku tamubuka yayik.

¹²Elam birye deibukba dadeipdanin balamik ninye yupa wik 1254 deiyamuk nang ara, Yerusalem mutuku tamubuka yayik.

¹³Zatu birye deibukba dadeipdanin balamik ninye yupa fia weik 845 deiyamuk nang ara, Yerusalem mutuku tamubuka yayik.

¹⁴Zakai birye deibukba dadeipdanin balamik ninye yupa weik 760 deiyamuk nang ara, Yerusalem mutuku tamubuka yayik.

¹⁵Binui birye deibukba dadeipdanin balamik ninye yupa weik 648 deiyamuk nang ara, Yerusalem mutuku tamubuka yayik.

¹⁶Bebai birye deibukba dadeipdanin biyik ninye yupa weik 628 deiyamuk nang ara, Yerusalem mutuku tamubuka yayik.

- 17 Azgat birye deibukba dadeipdanin biyik ninye yupa weik 2322 deiyamuk nang ara, Yerusalem mutuku tamubuka yayik.
- 18 Adonikam birye deibukba dadeipdanin biyik ninye yupa weik 667 deiyamuk nang ara, Yerusalem mutuku tamubuka yayik.
- 19 Bikwai birye deibukba dadeipdanin biyik ninye yupa weik 2067 deiyamuk nang ara, Yerusalem mutuku tamubuka yayik.
- 20 Adin birye deibukba dadeipdanin biyik ninye yupa weik 655 deiyamuk nang ara, Yerusalem mutuku tamubuka yayik.
- 21 Ater ap, Hizkia ap, sikce deiprikba dadeipdanin biyik ninye yupa ara 98 deiyamuk nang ara, Yerusalem mutuku tamubuka yayik.
- 22 Hasum birye deibukba dadeipdanin biyik ninye yupa weik 328 deiyamuk nang ara, Yerusalem mutuku tamubuka yayik.
- 23 Besai birye deibukba dadeipdanin biyik ninye yupa weik 324 deiyamuk nang ara, Yerusalem mutuku tamubuka yayik.
- 24 Harif birye deibukba dadeipdanin biyik ninye yupa weik 112 deiyamuk nang ara, Yerusalem mutuku tamubuka yayik.
- 25 Gibeon birye deibukba dadeipdanin biyik ninye yupa weik 95 deiyamuk nang ara, Yerusalem mutuku tamubuka yayik.
- 26 Tonda Betlehem mutuku ap, Netofa mutuku noutam ulamikce deibikba dadeipdanin biyik ninye yupa weik 188 nang ara, Yerusalem mutuku tamubuka yayik.
- 27 Atonun Anatot mutuku noutam ulamikce deibikba dadeipdanin biyik ninye yupa ara 128 nang ara, Yerusalem mutuku tamubuka yayik.
- 28 Bet-Azmawet mutuku noutam ulamikce deibikba dadeipdanin biyik ninye yupa ara 42 nang ara, Yerusalem mutuku tamubuka yayik.
- 29 Kiriath mutuku ap, Yerim mutuku ap, Ketira mutuku ap, Berot mutuku ap noutam ulamikce deibikba dadeipdanin biyik ninye yupa ara 743 nang ara, Yerusalem mutuku tamubuka yayik.
- 30 Rama mutuku ap, Gaba mutuku ap, noutam ulamikce deibikba dadeipdanin biyik ninye yupa ara 621 nang ara, Yerusalem mutuku tamubuka yayik.
- 31 Tonda Mikhmas mutuku noutam ulamikce deibikba dadeipdanin biyik ninye yupa ara, 122 nang ara Yerusalem mutuku tamubuka yayik.
- 32 Betel mutuku ap, Ai mutuku ap, ulamik ninye yupa ara 123 nang ara, Yerusalem mutuku tamubuka yayik.
- 33 Yuk mutuku ton Nebo mutuku ulamik ninye yupa ara (52) nang ara, Yerusalem mutuku tamubuka yayik.
- 34 Elam birye deibuk yuk ninye nirya ara yupa weik (1254) nang ara Yerusalem mutuku tamubuka yayik.
- 35 Harim birye deibuk ninye yupa ara weik (320) nang ara, Yerusalem mutuku tamubuka yayik.

- 36 Yeriko mutuku noutam ulamik ninye yupa fia weik (345) nang ara, Yerusalem mutuku tamubuka yayik.
- 37 Lod mutuku ap Hadid mutuku ap tonda Ono mutuku noutam ap ulamik ninye yupa ara (721) nang ara, Yerusalem mutuku tamubuka yayik.
- 38 Senaa birye deibuk dadeipdanin balamik ninye yupa weik (3930) nang ara, Yerusalem mutuku tamubuka yayik.
- 39 Asekeipnun nang si ara Babel mutuku bobinamikba daulamika ani tuba tamubuka yayik talak ara, Allah el si eren aik fum tam fil dona deiyok nang imam-iman nang ulamik. Yedaya birye Yesua deibukba dadeipdanin biyik ninye yupa ara, 973 nang Yerusalem mutuku tamubuka yayik.
- 40 Tonda, ninye el si Imer birye deibukba dadeipdanin balamik ninye yupa ara, 1052 nang Yerusalem mutuku tamubuka yayik.
- 41 Pasyur birye deibukba dadeipdanin balamik ninye yupa ara, 1247 koproba Yerusalem mutuku tamubuka yayik.
- 42 Harim birye deibukba dadeipdanin balamik ninye yupa ara, 1017 nang Yerusalem mutuku tamubuka yayik.
- 43 Aning atonun sik Lewi yala nang Babel mutuku arye tamubuka yayik talak Yesua ap, Kadmiel ap, Hodewa ap, sikce deibikba dadeipdanin balamik ninye yupa ara, 74 nang Yerusalem mutuku tamubuka yayik.
- 44 Asekeipne nang sikda mot sena ati deiyok kin nang ap, tonda Allah yupu aik bublan dam kalikin nang ap ulamik. Sik si ara ani. Ara, Asaf birye deibukba dadeipdanin balamik nang yupa 148 nang ara, Yerusalem mutuku tamubuka yayik.
- 45 Allah Yahweh el aik bisik bublan dam kaliklamik nang sik si ara ani. Ara, Salum ap, Ater ap, Talmon ap, Akub ap, Hatita ap, Sobai ap, sikce deibikba dadeipdanin balamik nang yupa 138 nang ara, Yerusalem mutuku tamubuka yayik.
- 46-56 Babel mutuku bobuka binamik ninye bukni tuba tamubuka yayik talak arye deibikba Allah Yahweh el si eren aik fum tam talibuka fil dona deiyok nang ati melilamik ninye sik si ara ani. Siha ap, Hasufa ap, Tabaot ap,
 Keros ap, Sia ap, Padon ap, Lebana ap,
 Hagaba ap, Salmai ap, Hanan ap, Gidel ap,
 Gahar ap, Reaya ap, Resin ap, Nekoda ap,
 Gazam ap, Uzah ap, Paseah ap, Besai ap,
 Meunim ap, Nefusim ap, Bakbuk ap, Hakufa ap,
 Harhur ap, Bazlit ap, Mehida ap, Harsa ap,
 Barkos ap, Sisera ap, Temah ap, Neziah ap, Hatifa ap, sik winibuka ninye nirya ara, Yerusalem mutuku tamubuka yayikce, Allah el si eren aik fum tam fil dona deiyok nang ati melilamik.

57-59 Aning ara, minop talak ninye deiyoknye Raja Salomo el fil dolamik nang ara, Babel mutuku nang arye bobinamikba daulamika ani, sikce deibikba, dadeipdanin balamika ani, deibik mapu ara, tuba tamubuka Yerusalem mutuku yayik ninye sik si ani. Sotai ap, Soferet ap, Perida ap, Yala ap, Darkon ap, Gidel ap, Sefaca ap, Hatil ap, Pokheret ap, Hazebaim ap, Amon ap, sik winibuka nang Yerusalem mutuku tamubuka yayik.

60 Ati ara, Allah Yahweh el aik fum tam fil dona deiyok nang, sik melilamik nang ap, ninye deiyoknye Raja Salomo el fil melibuka dolamik ninye ap, Babel mutuku nang arye bobinamikba daulamika ani, sikce deibikba dadeipdanin, balamikce deibik mapu ara, tuba tamubuka Yerusalem mutuku yayik ninye nirya sik yupa ara, 392 ninye ulamik. Aninye nirya ara, Yerusalem mutuku tamubuka yayik.

61 Aning atonun, Tel-Mela mutuku ap, Tel-Harsa mutuku ap, Kerub mutuku ap, Adon mutuku ap, Imer mutuku ap arye yayik ninye yupa ara, 642 ninye Yerusalem mutuku tamubuka yayik. Yayik bukni, sik ni yapu arye deiamik mutuku, lak len surat kum wamukba, sikce, “Nun ni yapu ara dipkoprop Israel ninye ulamik,” nyabuka, lak nyapmanto kum ulamik. 62 Tonda, Delaya ap, Tobia ap, Nekoda ap, sikce deibikba dadeipdanin, balamika ani, deibik mapu yupa ara, 642 ninye ulamik. Aninye babye Yerusalem mutuku tamubuka yayik.

63-64 Tonda, Allah el si eren aik fum tam talibuka fil dona deiyok nang imam yala nang arye deibikba dadeipdanin, balamika ani, deibik mapu ara, tuba tamubuka Yerusalem mutuku yayik ninye sik ni yapu si ara ani. Ara Habaya ap, Hakos ap, Barsilai ap ulamik. Tonda, anye bira Barsilai bira, Gilead mutukunye ulamukce, Israel yalanye el si Barsilai birye deibuk kilmu dobuka anya arye, atalak ulamik ninye arye, aGilead mutukunye el si ati, Barsilai nyalamik. Anang arye deibikba, dadeipdanin yangalamik ani deiamik mapu ton Yerusalem mutuku tamubuka yayik.

Sik anang nirya ara, “Nun ni yapu imam yala nang arye deiyamsik ati, imam fil nunce talibuka doptibye,” nyabikce, sik delina ati sekuka deilin ning epdeyik bukni, kum eibika ati, Allah el aik deiyok nang arye, “Kume, anggunda Allah el si eren aik fum tam talibuka fil kum doptume. Ara, talye ati kume. Allah arye, ‘Imam yala nang uk afil talibuka donamake. Yuk yala nang nirya ara, na aik fum tam fia kum wektinge,’ nyapsuka ati, ‘Anggunda imam yala nang dipkoprop ululum do, kum do?’ tenen, teniltona unmasil ati, Allah el aik fum tam fil kum doptume,” nyabuka anang batakikba, talye ninye atonun kibuka ulamik.

65 Ati ara, Yehuda yala ninye mutuku talibuka ulamuknye Gubernur arye, “Allah ati arenamak teleb ning nirya ara, anggunce ton kum dinamlume,” nyabuka yupu seklamuk. “Tonda sik imam nang min kum wipdeipmapa ati,

Allah arenamak teleb ning kum diptume. Bukni, imam nang wipdeibibye ura, sikce, 'Aning winibice deice arye lak kipnamsil' tenen, talibuka fil donyak ning el si Urim ap, Tumim ap deice arye, fil dobice talak uk, amambul ning dobuka diptum bukni, winitalak ara, kabule," nyabuk.

⁶⁶⁻⁶⁹Babel mutuku bobinamik ani, tuba tamubuka sik mutuku yayik ninye yupa niryra ara, fia weik 42 ribu 360 ninye ulamik. Tonda aninye sik aik fil melin nang ara atonun yupa weik kilapu ap, sal ap 7.337 ninye ulamik. Tonda mot nyan ati yala ninye niryra ara sal babye, kilapu babye, sik yupa ara 245 ninye ulamik. Aning atonun, sik aninye arye talibuka ulamik kuda basam yupa ara, 736 kuda bobuka yayik. Tonda mitiktonun kuda atonun bukni, yuk yala basam el si ara bagal basam ara, yupa weik 245 tamubuka boyayik. Aning atonun, unta basam yupa weik 435 tamubuka boyayik. Tonda keledai basam yupa weik 6.720 tamubuka boyayik. Anang niryra ap, sik weilamik ning aning-aning niryra ap, Yerusalem mutuku tamubuka boyayik.

⁷⁰Ura, amutuku ulamik ninye niryra arye, Allah Yahweh el si eren aik winiryuk ning donamak ning ap, keil foka dopnamak ning ap, melibuka arina ati, sik ni yapu uk, auang yo bok bulubuka arelamik. Ton nang ara sik ap neika dukdongobuka aik don fil ap, keil foka dona fil ap tabakuka dolamik. Tonda sik deiyoknye Gubernur bira, dekna weik ning el si ara, emas 8 kilogram aribuk. Tonda, sik imam nang melina ati, yangalin ning baskom 50 ap, tonda, 'Sik imam anyaik fum tam fil donamak talak ongonamak' tenen, kemeja butum aling 530 aribuk.

⁷¹Aning atonun yuk aik deiyok nang ton sik neika dukdongobuka ulamik ninye arye, dekna weik ning el si emas bulubuka 168 kilogram emas aribik. Tonda, dekna weik ning el si perak ara, 1.250 kilogram aribik. Ara, urdem ati kume. 'Allah el si eren aik dona ap, akeil foka dona ap, kanam uptu' tenen, aribik.

⁷²Aning atonun, sik talye daulamik Israel ninye arye dekna weik ning, el si emas bulubuka 168 kilogram emas aribik. Tonda, dekna weik ning el si perak ara, 140 kilogram aribik. Tonda, sik imam nang melina ati, 'Sik imam anyaik fum tam fil donamak talak ongonamak' tenen, kemeja butum aling 67 aribik.

⁷³Sik imam nang, Allah el si eren aik koprop fil dona deiyok nang ap, sik Lewi yala ninye ap, Allah Yahweh el aik bisik bublan dam kalikna nang ap, tonda Allah yupu mot sena deiyok ninye ap, Allah el aik fum tam fil dona deiyok nang, sik fil melibuka dolamik ninye ap, Israel nang ayala-ayala niryra daulamik ninye ap, Yehuda mutuku noutam tamubuka yayikop ura, sik min arye ulamik mutuku uk, yanuka yuk-yuk ulamik.

**Allah arye, 'Wininamlulume, aning ara ton kum wininamlulume,'
nyalamuk yupu, Esra birye dobuka lak nyabuk yupu**

8 ¹Yerusalem mutuku noutam ara, mek kwelbalamik bublan dam bukni, weik lo wamukce, dalalamuk sukumuk Israel ninye niryra

bulubik. Bulubukabikce, sikce Esra biti nyabik. “Naio, Allah el si Yahweh arye, nun Israel ninye ati, ‘Aning ara wininamlume, aning ara ton kum wininamlume,’ nyapdeipsuk yupu, kekenamaba ati, Allah arye nyapdeiamukba, Musa birye sekeiamsuk buku, Mem Yupu buku boyamince, yinipnamsilame,” nyabik. Esra bira, Allah nyalamuk yupu lak nyana ap, peterena ap deiyoknye ulamuk.

²Nyabika ati, tek barye wala bukni, min yuma sum akunum kibukop ura, Allah el si eren aik fil dolamuknye Esra bira, Allah el si Yahweh arye nyalamuk yupu dobuka boyayuk. Ara, Allah arye Israel ninye ati, ‘Wininamlulume, aning ara ton kum wininamlume,’ nyapdeiyamuk yupu, Mem Yupu buku boyayuk. Israel ninye ara, urdem unmekak uk, Esra birye abuku boyayuk. Atalak akunum ubukop ura, ayupu kekepmanto ninye nirya, Israel ninye sal ap, kilapu ap, mapu ap nirya, mek kweyangan bisik bublan dam yanuka tikmekbuk, Esra birye abuku yinibuk. Ara, Allah arye nyabukba, Musa birye sekeiyamuk buku, Mem Yupu buku yinibuk.

³Awala akunum ubukop ura, Allah el si eren aik fil donanye Esra birye, mek kwelbalamik bisik bublan dam tikukce, Mem Yupu buku yinibuk. Esra birye yininmok talak ara, Israel ninye sal ap, kilapu ap, mapu ap nirya, tonda ayupu kekepmanto nang nirya ap, abublan dam uk bulubuka wekmekce, fia moubuka kekenmek. Esra birye yininmok talak ara, berentam talak arye yininmoka ani, keteng duk-duk akunum ubukop ura, akunum sirya dakukce, batakuk. Abuku Mem Yupu buku yinibuka nyanmok talak ara, sik sal ap, kilapu ap, mapu ap nirya, tunimabuka bukmekece, moubuka kekenmek. ‘Ayupu ara mambule’ tenen, fia moubuka kekenmek.

⁴‘Esra bira Allah arye nyalamuk Mem Yupu, buku yininamal’ tenen, cang yo dobuka deipmekak, welebinuka tikukce ayupu yinibuk. El binuka tikuk talak ara, el sirik tam ara, ninye ton tikik. Sik si ara, Matica, Sema, Anaya, Uria, Hilkia, tonda Maseya neika tikmek. Aning atonun, el kwanim tam neika yanuka tikmek nang sik si ara, Pedaya, Misael, Malkia, Hasum, Hasbadana, Zakaria, tonda Mesulam tikmek.

⁵Winibik talak ara, Esra birye, asum kintinepdeipmek cang yo moropdeipmek deice, welebuka tikmoka ati, sik Israel ninye nirya, bulubuka wekmek nang nirye arye, tukwak bukuka Esra biti dinmek. Esra birye, ‘Abuku yinipnun’ tenen, yokeibuk talak ara, abulupmek nang nirye arye, ‘Si erepnamap’ tenen, tikmekce dinmek. ⁶Winibik ura, Esra birye, “Nun Ni Koproba Allah, el si Yahweh ara, fia teleb, mikip weiknye ulule,” nyabuka si erenmok talak ara, sik abulupmek ninye nirye arye, sik taruk erebukabikce nyanmek. “Fia dipkoprop, nyanmalama ati, ‘Dipkoproba akunuma’ tenen, ‘Amin,’ nyapmabe,” nyanmek. Nyanmek ning ara, Allah el si erena ati, atalak aryuk sik nirya nong

kanupdongobikce, tukwak dinmekce, Allah el si Yahweh atibuk, el si erebuka winilinmek.

⁷Tonda, atalak uk, Allah arye, ‘Wininamlulume, aning ara ton kum wininamlume,’ nyabuka minop talak nyalamuk yupu ara, sik Lewi yala nang, Mem Yupu peterena deiyok nang unmeka anya arye, anang arye, “Allah nyalamuk yupu deiyok ara, ani, ani,” nyabukabikce, Israel ninye ati lak nyabuka peterenmek. Sik Lewi yala nang, peterenmek nang, sik si ara ani. Yesua, Bani, Serebya, Yamin, Akub, Sabetai, Hodia, Maseya, Kelita, Asarya, Yosabad, Hanan, tonda Pelaya. Anang arye peterenmekba, sik atikmek nang moubuka kekenmek.

⁸Mem Yupu buku noutamak sekamuk ning ara, Allah arye Israel ninye ati, ‘Wininamlume, aning ara ton kum wininamlume,’ nyapdeiyamuk yupu dobukabikce, deiyok ning ati, lak nyabuka peterenmek. Ara, ‘Israel ninye nirye arye, ayupu deiyok ning moubuka kel biknamak’ tenen, sekuka kintinipdeiyamik ning pasal, ayat nyanmek talak ara, ayupu deiyok ning ton, lak nyanmek. Sik Lewi yala nang arye, “Anggun Ni Koprop Allah, Yahweh arye nyapdeipsuk yupu ara, ani. Tonda ayupu deiyok ara, winibuka nyapsuke. Nyapsuk ati wininamabe,” nyabuka, lak peterenmekba, abulupmek nang nirye arye moubuka kekenmek.

⁹Lewi yala nang arye, Allah nyalamuk Mem Yupu yininmek talak ara, Israel ninye kekenmekce, ‘Se, ayupu ara mambul weike’ tenen, engenmek. Engenmekba, amutuku ninye deiyok talyamuknye, Gubernur Nehemia ap, tonda Allah el si erena aik fum tam fil dolamukce, Allah yupu peterena fil talyamuka deiyoknye Esra ap, tonda, atalak Allah el yupu peterenmek nang, Lewi yala nang ap, sik Israel ninye nirye arye bulubuka kekenmek nang ati nyabik. “Nun Ni Koprop Allah, el si Yahweh ara, arup ara el weik ilil sum uple. Ati ara, Allah yupu atalak nyapmap ning ati, kekebuka tenipmunce, engena meme,” nyabik.

¹⁰Nyabik ura, Nehemia birye sik Israel ninye nirya ati, nyabuk. “Anggunda kum engenamlum bukni, fia teleb din ning ap, to ning ap, teleb mek ap, dilbinamlume. Winipmunce, yuk tam nang ara, ateleb dina kum kintinipmace nang ati, dobuka aripnamlume. Arup ara, Nun Ni Koprop Allah, el si Yahweh, el weik mambul sum upmasile. Ati, winitalak ara, engena kume. Nun ni Yahweh arye, el melisilya deice arye, kanye pin-pin usulule. Ateleb kanye talima arisilya deice arye, mikip kilisulule. Ati ara, asum engena kume,” nyabuk.

¹¹Ayupu nyapmok touk, sik Lewi yala nang arye, sik Israel ninye nirya ati nyabik. “Anggun nirya tunim aplulume. Ikin kanye bobuka engena kume. Asum ara, Nun Ni Koprop Allah, el mambul sum anya arye, talima ikin kanye bona kume. Tunimabuka unamlume,” nyabikop ura, aninye nirya engenmek ning ara, batakuka tunim abik.

¹²Lewi yala nang arye nyabikop ura, Israel ninye nirya kekebikce, abulupmekba batakuka, sik yuk-yuk bindobik. Bindobikce, teleb din ning

ap, mek ap dilbiyik. Tonda, ateleb din ning kum kintinipmek nang ati, ton tam bokuka arilbanmek. Winipmekce, teleb kanye bobuka, pin-pin asa arye, Allah el si erelamik. Teleb kanye bobuka unmeke deiyok ara, sik Lewi yala nang arye, Allah nyalamuk yupu yinibuka, deiyok ning lak kibuka lak nyanmekba, Israel ninye nirye arye, ‘Deiyok ani’ tenen, akunum kel bikmeke ati, fia teleb kanye deibuka unmek.

¹³Unmekce, mapmeke berekukop ura, awala uk bukni, like bitinye sum ara, Israel ninye nirya, sik yala yuk-yuk aunmek touk, ayala-ayala deiyok nang nirya ap, Allah el aik fum tam fil don nang ap, tonda sik melin nang, Lewi yala nang ap, nirya bulubuka Esra dam yanmek. Winipmeke deiyok ara, Allah arye nun ti, ‘Wininamlume, aning ara ton kum wininamlume,’ nyabuka minop talak nyapdeiamsuk yupu, ‘Allah yupu peterena deiyoknye Esra birye, ayupu nyapnusile’ tenen, el dam yanmekba, Esra birye ayupu peterebukba, moubuka kekenmek.

¹⁴Allah el si Yahweh arye, ‘Aning ara wininamlume, aning ara ton kum wininamlume,’ nyabuka, Israel ninye ati nyalamukba, Musa birye sekiamuk buku ara, Esra birye yininmokba kekebik. Abuku wamuk yupu noutam arye, aning ton kel bikik. Ara, abuku noutam, ayupu wamuk. Allah arye nyabuk. “Tek barye wala akunum uplyop ura, Israel nang nirye arye, mitik bai doltakne aik dopna arye, tek barye wala noutam nirya ara, bai tam doltakne aik fum bisik uk unamake. Ara, kwalya kwalinamlum talak noutam arye anyaik unamlume,” nyabuk. Ayupu ara, abuku noutamak sekeiamuk ning ara, Esra birye eibuka yinibukba, kekebuka kel bikik.

¹⁵Tonda ayupu ton wamukba kekebikce kel kibik. Ara, Allah arye nyabuk, “Yerusalem mutuku noutamak ap, anggun unamlumak nirya ap ara, ayupu bobuka lak nyalbinamlume. Ara, bai tam bimunce, yo kan-kan arye, yo taruk sekuka boyanamlume. Ayo taruk yala ara, ninye arye kouamik zaitun yo taruk ap, talye bai tam palamle zaitun yo taruk ap, kepyal yo taruk ap, palma yo taruk ap, tonda yo bok weik ulamle yo taruk ap, yo bata ap kakapmunce, boyanamlulume. Yamunba, talye bai asik atonun aik, mitik doltakne aik dopnamlume. Dopmunyop ura, tek barye wala noutam nirya ara, anyaikuk tia unamlume. Aunamluma ara, Allah nyalamukba, Musa sekeiamsuk yupu noutam anyapdeipsuk touk wininamlume,” Esra birye yinibuka nyabuk. Ayupu wamuk ning ton kekebuka kel kibik.

¹⁶Esra birye ayupu yinibukba, kekebikop ura, atalak aryuk, sik Israel nang nirye arye, Allah yupu nyalamuk touk, bai tam binmekce, yo bok weik wamuk yo kakabikce, tuba tamubuka Yerusalem mutuku noutam boyanganmek. Boyayikop ura, sik nirye arye yuk-yuk mitik bai asik atonun ning, doltakne aik yanuka dolamik. Ara, sik min arye keil aik lu kibuka domik aik deice tam, mitik doltakne aik dobik. Ton nang ara, sik

asik dam dobik. Ton nang ara, Allah el si eren aik mining dam dobik. Ton nang ara, mek kwelban bisik bublan dam dobik. Ton nang ara, tonok pala lo ubukak noutam dobik. Tonda Efrahim yala nang arye balamik bisik bublan dam ton dobik. Ara, yuk-yukak mitik doltakne aik weik dolamik.

¹⁷Minop talak, sik Persia mutuku nang arye, Israel ninye ati obuka sirya dakikce, ninye weik dobuka bobiyikba, daulamika ani, tuba tamubuka Yerusalem mutuku winiryuk tamubuka yayik ninye nirye arye, amitik doltakne aik domik. Akunum dobikce, atalak ara bai tam aik fum bisik uk, tia talak ati unmek. Anang unmek nang ara, ninye si Nun, el mi Yosua ulamuk talak arye dipdongobuka, danoutam talak nirya ara, anang ton kum ulamik. Aketeng tamun, aketeng tamun yupa weik noutam nirya ara, Allah el si erena ati, mitik doltakne aik dobuka kum ulamik bukni, atalak ara tuba tonap ubik. Winibika ati ara, sik nirya kanye teleb bobuka pin-pin asa aryuk unmek.

¹⁸Aunmek talak noutam, like tek barye sum deice ara, Esra bira, Allah arye nyalamuk yupu, Mem Yupu noutam arye yinibuka peterenmok. Ara, Allah arye, Israel nang ati, 'Wininamlume, aning ara ton kum wininamlume,' nyapdeiyamuk yupu, Mem Yupu buku yokuka yininmok. Atalak noutamak nirya, akwalya kwalilamikce, pin-pin asa arye unmek. Min yuma sum arye dipdongobuka, tek barye sum ubukop ura, sirya sum upnop ura sirya dakalongolamik. Dakalongon sum akunum ubukop ura, Allah yupu deice nyalamuk touk, sik nirya tonokak uk bulubukabikce, yupa talipmek.

Israel ninye arye, "Nun malye ulamupu ning ara ani, ani," nyabuka, lak kibuka lak nyabikce, amalye ning batakuka, Allah ati morolamik yupu

9 ¹Wala tek barye ubukce, like dua puluh empat sum akunum ubukop ura, Israel ninye nirye arye, ikin kanye bobikce, din dina kumce, si tebuka unmek. Winibuka unmekce, malye butum aling arye nong ongobuka, atu butbuta dobuka, sik kisok deice dikdeipdanuka unmek. Winilamika deiyok ara, sik malye ulamik ning ati, 'Se malye winilamupu,' tenen ati, winilamik. ²Atalak ara, Israel yala ninye arye, 'Nun malye ulamupu ning lak kibuka nyanamabe' tenen, yuk mutuku yala nang ap, ansinibuka kum unmek. Yuk mutuku nang ara, bokuka wiliprobik. Atalak ara, Israel ninye nirya tikikce, sik malye winilamik ning ati, lak nyanmek. Tonda, sik apu yapu malye winilamik ning ap ati, lak kibuka laka lenmek.

³Sik atikmek talak noutam aryuk, Allah arye Musa biti nyalamukba, sekiamuk Mem Yupu noutamak dobuka yininmek. Sik yininmek buku ara, Allah el si Yahweh arye, "Aning ara wininamlulume, aning ara kum wininamlulume," nyapdeiamukba, sekiamuk yupu yininmek. Keteng winilye deice arye winibuka akunum yinibikop ura, sik malye winilamik

ning ati, keteng winilye deice arye, laka nyanmek. Akunum lak nyabikop ura, sik Ni Koprop Allah, el si Yahweh ati, el si erebukabikke, si erebik.

⁴Lewi yala nang tikina ati, yo morobuka lapdeiyamika ara, Yesua ap, Katmiel ap, Bani ap, Sebanya ap, Buni ap, Serebya ap, Bani ap, Kenai ap, tikmek. Sik anang binuka tikikce, yupu weik asa arye, sik ni Allah, el si Yahweh ati, moronmek. ⁵Atalak ara, Lewi yala nang arye deiyok koubuka, Allah ati moronmek. Moronmek nang sik si ara ani. Jeshua ap, Kadmiel ap, Bani ap, Hasabneya ap, Serebya ap, Hodia ap, Sebanya ap, tonda Petahya ap arye, moronmek. Moronmekce, nyanmek, “Anggun nirya tiklulume. Anggun Ni Koprop Allah, el si Yahweh ati, si erepnamlume. Yahweh ara, minop arye aulamuk ani, winitalak babye, doyanamle talak babye, afia unamlanye, Allah el si erenamlume,” nyanmek. Sikce nyanmek yupu ara ani.

“Nun ni Allah, an si weik mambule. An ap, an si ap ati, ‘Fia telebe,’ ‘Ninye mutuku-mutuku nirya an si bikkitinge’ tenen, nyapkiyabe. Yuk-yuk ning, ance arisilyam ning nirya ati, ‘Aning ara mitik mambule’ tenen, ‘Telebe,’ nyaptibye bukni, an tonok ati ara, fia weik arye an si erenyabe. Yuk teleb ning nirya ara, an amutam uliba, anda weik si erenanye deice tam ulyama anya arye, ‘Anda weik mambule,’ nyapkiyabe. Yuk ning nirya ara, mitik mambul uka. Ati ara, an ti fia si erenamkiyabe,” nyabuka si erenmek. ⁶Tonda, sik Israel ninye arye, nyabik.

Yahweh an tonok ara, dipkoprop Allah ulyame. Yuk ton kum ulule. Ancuk im deice kwepdeiplume. Ancuk im deice ulul ning kurya ap, wala ap, keteng ap, aning-aning nirya kwepdeiplume. Tonda, laut mekwen ap, laut mekwen noutamak ulul ning ap, tukwak mutuku ap, tukwak mutuku noutamak ulul ning ap, nirye ara, ancuk kwepdeiplume. Winiplumce, aning-aning nirya kam una ati, isin areplumce, meliminba, tuba kam unyake. Ati ara, im deice yin talibuka unyak maliakat nirye arye, an si erena ati, kisok kanupdongobuka si erekinyake.

⁷Nun Ni Koprop Allah, an Yahweh aryuk, nun apu koprop Ur-Kasdim mutuku ninye noutamak ulamak bukni, ‘Anye bira telebe’ tenen, Abram wipdeiyalume. Winiplumce, Abram boyanalume. Winiplumce, el si winiryuk si, Abraham nyabuka, si doplume. ⁸Abraham wipdeipluma deiyok ara, an ti dib tenelamkukce, fia kum batakklamkukba elilaluma ati, wipdeiplume. Winiplumce, Abraham biti, “Ance deipminba, dadeipdanin banamak nang ati, teleb mutuku aripnamsine,” nyapdeiamlumce nyalin yupu areplume.

Abraham biti, ‘Amutuku-amutuku nirya aripnamsine,’ nyapdeiamlum mutuku, amutuku unyak nang sik yala si ara, Kanaan mutuku nang ap, Het mutuku nang ap, Amori mutuku nang ap, Feris mutuku nang ap, Yebus mutuku nang ap, Girgasi mutuku nang ap, ulamik. Ance Abraham biti, “Ayala nang nirya, sik talibuka unyak mutuku-mutuku

nirya dobuka, an mapu ati aripnamne. Ara, ance deipminba, dadeipdanin banamak mapu ati, aripnamne,” nyapdeiplume. Allah anda, fia diksukum ulyamnye binya arye, ance nyamsulum touk akunum winipmasilame.

Sik Lewi yala nang arye nyabik.

⁹Nyabikce, ayupu ton dukdongobuka nyabik. Allah ance nun apu yapu Mesir mutuku noutam fil dolamikce, ikin kanye bobuka ulamik talak ara, an elilamlumce kel bikamlume. Tonda, nun apu yapu laut mekwen Teberau dam engebuka malye yupu nyanmekba, kekamlume.

¹⁰Kekeplumce, Allah ancuk Firaun ap, el amutam deiyok nang ap, el mutuku nang talye nang nirya ap, diplamikba, ance ninye winipmanto kum fil weik dolamlume. Winilamluma ara, ‘Amutuku nang arye aning eipkikirye, Se, dipkoprop Allah aryuk afil donmasile’ tenepnamak tenen, winilamlume.

Winilamluma deiyok ara, sik Mesir mutuku nang arye, ilil kum asa weik ulamikce, an mapu ati, ikin ning sik nong deice delilamikbuk, ance weik mambul fil dolamlume. Ninye winipmanto kum fil dolamluma deice arye, an si weik kipdalumba, atalak ulamik ninye nirya kel bikamike. Winipluma ati, winitalak babye, ninye mutuku-mutuku nirye arye, an si erebikirye, ‘Aning ara weik mambule,’ tuba tenenyake. Ton ning ara, an si ati weik arye erekinyake.

¹¹Minop talak, nun apu yapu Israel nang, sik dinmekak arye, weik laut mekwen cepdobukba, tuku mikuka deice ak, koubuka yanamik. Bukni, ‘Israel ninye opnuyp’ tenen, dobolbanmek nang, Mesir ninye ara, an mikip deice arye, mek siklipdongobuka oplume. Ninye arye keil dobuka, weik mek mekwen noutam donokikiba, mek fum bisik saklirye, mek lontik abuka dilamle atonun, Mesir ninye laut mekwen noutam kintinipdeipmalum bisik wekelyayik talak ara, ance mambul fil domluma deice arye, anang sik nong deice mek siklipdongobuka, dibuk. Anang nirya obuka sirya daklume.

¹²Tonda, nun apu yapu arye, ‘Dan bisik binuyap do?’ tenen, ‘Sik kanye walwal uplyak’ tenen, sik melina ati, ance keteng noutam talak ara, weik dua dobdeiamlumba, ayukumna yo atonun tikamukce, menekuka balamukba, sik aminyan tam balamik. Lukunyan talak ara, weik uku buk aryamlumba, dirina weik akman bisik uk, nun apu yapu eibuka balamik. ¹³Tonda, an im deice arye koulukuka, Sinai mutuku deice tikilyanmalumce, Israel ninye kekenak ati nyapdeiamlume. Atalak arye, ance, “Aning ara wininamlume, aning ara kum wininamlume,” nyabuka, im deice arye diksukum yupu uk nyapdeiamsulume. Anyapdeiamsulum yupu nirya ara, dipkoprop teleb yupu uk ulule.

¹⁴Tonda, ance, “Tek barye sum ara, na Sabat sum, weik sum ati, asum noutam ara, fil nirya dona kumce, teleb uk unamlulume. Teleb koprop uk unamlume. Tonda, “Aning ara wininamlume, aning ara kum

wininamlume,” nyabuka, an fil donanye Musa deice nyapdeiamlumba, Musa birye sekeiamsukce, laka nyamsuke.

¹⁵Winilamlumce, nun apu yapu, sik din patalamuk talak ara, im deice arye mana kwaning weik dolkwetelamlumba, bulubuka dilamik. Tonda, mek patalamuk talak ara, gat keil deice arye, mek areplumba, fanabuka yayukba dibik. Tonda, minop talak ara, an taruk ereplumce, ance nun apu yapu ati, ‘Na si deice arye, teleb mutuku aripnamsine,’ nyalin yupu nyapdeiamsulume. Aminyan talak ara, ance sik ti, ‘Winitalak amutuku akunum aripsina ati, adib aryuk amutuku wekelbimunce, talibuka unamlume,’ nyapdeamsulume.”

¹⁶Ance aning-aning nirya weik winilamsulum bukni, nun apu yapu, mandipna kanye bomikke, ance, ‘Aning ara wininamlume, aning ara kum wininamlume,’ nyapdeiamsulum yupu kum kekelamikce, ‘Aning nirya ara nun like,’ tenelamikce, an yupu batakuka kum dobolbalamike. ¹⁷Ance sik ti bico tenebuka, teleb una ati winilalum ning ara, luba kiyamike. Tonda, sik dam ninye winipmanto kum fil dolalum ning nirya ara, tuba kum tenilamikce, luba kiamik. An nyalalum yupu yanibikke, mandipna kanye bobikke kwalilamikce, ‘Mesir mutuku tuba tamubuka bobisiliba, sik amutam talye fil don nang unamap’ tenen, sik bidamnye arye, ninye deiyoknye wipdeibik.

Malye weik winilamik bukni, Allah anda ninye nirya malye wininyak ning namin kina deiyoknye ulyame. Min fola kum wenesilyamce, an kanye aryuk weik bico tenepsimince, weik arye melisilyame. Bico tenesiminye ning ara, weik arye bico tenesilyame. Winilyama arye, nun apu yapu kum batakamlume.

¹⁸Winilamluma babye, sikce tamubuka sapi basam mi urasin atonun memepdeibikke, “Nun Mesir mutuku arye bobuka yanamsuk Allah ara, atia,” nyabuka el si uk erenyakce, Allah an si yanipkike. Tonda, ance, ‘Aning ara fia na like,’ teneminye ning ara, sikce aning uk winilamik. Tonda, sikce an nong deice malye yupu nyalamkik ning babye, luba kiplumce, kum batakamlume.

¹⁹Nun ni Allah, ance weik bico tenelamsulumce, winipsulum ati, nun apu yapu, mek kum ati, ninye kum ulamikak mutuku noutamak yangalamik talak ara, kum batakamlume. Sik ti bico tenebuka tuba melilalume. Winilamluma ara, keteng noutam balamik talak ara, weik dua ayukumna yo atonun ubuka, tikna arye, menekuka banmanabuk, aminyan dobolbalamik. Aning atonun, lukunyan talak ara, weik uku buk dirina wamukce, ayukumna yo atonun tikamuk. Adirina deice arye, sik binaman bisik eipna arye balamik. Malye ulamika babye, adua ap, auku buk ap, tuba tamubuka kum dopromlume.

²⁰Tonda, ance sik kel kina ati, an Dib Kanye sik dam dopdeiplume. Tonda sik din ati, im deice arye, manna kwaning dopdeiyalumba,

bulubuka dilamik. Sik mek patapne talak ara, sik mek dina ati arelamlume. ²¹Nun apu yapu ara, mek kum ati, ninye kum ulamik mutuku bisik balamik talak ara, keteng tamun empat puluh tahun deice arye, ‘Anang dibicak’ tenen, ance sik ti fia kalikuka melilamlume. Amok ap, mek ap kum ati, bupu weik arye ninye kum ulamik mutuku balamik talak nirya ara, sik patalamuk ning nirya melibuka aripnin balamlume. Ance sik ti, ton kum batakklume. Tuba meilyamlumba, sik butum aling ton kum kwilikamuk. Sik yan ton nebuka uk kum dilamuk. Teleb uk ulamik.

²²Aning uk kum bukni, tonda, ance meilyamluma deice arye, sik wekelbinamik mutuku talibuka ulamik nang nirya obuka sirya dakikce, wekelyayik. Wekelyayikce, amutuku talibuka ulamik. Mining dam uk kum bukni, pera mutuku babye, areplamlumba, dololamik. Hesibon mutuku ninye deiyoknye, Sihon talibuka ulamik mutuku binuka alabdobikce, talibuka ulamik. Tonda, Basan mutuku ninye deiyoknye Og, elce talyamuk mutuku binuka doprobikce, talibuka ulamik.

²³Ance meilyamluma deice arye, Israel ninye sik mapu fia weik arelalumba, kurya im deice tiklamle atonun, aninye arye mapu weik delilamikba, yupa weik kipnin balamik. Tonda, ance nun ni yapu ati, “Teleb mutuku aripnamsine. Amutuku wekmunce talibuka unamlume,” nyapdeiamsulum mutuku, sik delilamik mapu ati areplume. Areplumba doprobikce, amutuku teleb uk fia ulamik.

²⁴Sikce delilamik mapu amutuku wekelbiyikce, talibuka ulamik. Ance mikip aryamlumba, amutuku talyamik nang, Kanaan yala nang ara, Israel nang arye, obuka kumdanipna arye, sik mutuku talibuka ulamik. Ara, ance meilyamluma deice arye, sik Kanaan tam weik ninye deiyok talibuka ulamik nang ap, sik amutam talye ulamik nang ap, nun apu yapu arye anang nirya obuka sirya dakna arye, sik tenelamik touk, wenebuka oltaklamik.

²⁵Israel nang arye, amutuku weik keil foka dona ati, keil deikuka deipwelepna arye, antanapdongobuka dolamikce, weik aik alapdobik. Tonda, teleb wa suku ap, teleb suku ap, binuka alapdobik. Tonda, bona utotota talin nang arye, talibuka ulamik aik ap, aik noutamak talibuka delilamik ning ap, teleb ning ap, binuka doprobik. Tonda, amutuku nang arye, palyamik mekwen ap, sik talilamik mek pu ap, anggur tapu wa suku ap, zaitun yo koulamikba duk moulamuk mutuku ap, yuk yala yo duk moulamuk yo ap, binuka talye parapakbuka doprobik. Alubuka doprobikce, dilamikba, sik nong teleb nelamikce, sik teleb kanye bobuka ulamik. Ance nun apu yapu weik arye meilyamlumba teleb arye pin-pin kanye bobuka ulamik.

²⁶Aning-aning nirya teleb uk ulamuk bukni, nun apu yapu arye, an nyalalum yupu nirya ara, bisibuka yanibikce, ‘Allah nyasulul yupu

ara nun like, aning kum wininamabe,' tenelamikce, malye ning uk winilamike. Ance, 'Wininamlulume,' nyabuka, Mem Yupu nyalalum ning atonun, fia ton kum dukdongobuka winilamik. Winilamik ati ara, an yupu lak nyan nang arye, "Nun malye winilamap ning ara, batakibirye, nun Ni Koproba Allah, el yupu uk kekebuka unamabe. El dam tuba tamubuka bibirye, el ap talima dukdongobuka unamabe," nyalamik nang nirya, obuka batakklamik. Tonda an ap, an si ap ati, fia malye yupu nyabuka, weik malye kilamikce, ance, 'Aning ara na lik ati, fia kum wininamlume,' nyapdeiyamsulum ning ara, aning ton winilamike.

²⁷Winilamika ati, ance sik olan nang ati, mikip sik deice deipnaba, anang arye nun apu yapu yanuka olamik. Obuka sirya daklamikce, Israel nang sik nong deice ikin fil delilamikba, Israel ninye, sik kanye imun ulamukba, "Se, Nun ni Allah, ance melipsilyame," nyabuka morolamik. Moropnop ura, an im deice arye kekebuka kum batakklamik. Sik ti fia bico tenelamlum ati, Israel nang melina ati, yuk nang deice mikip kipdeipnaba, Israel sik olan nang binuka, obuka sirya daklamik. Obuka sirya daklamika deice arye, Israel ninye lyelolamlume. Ara, tonok talak aryuk kume. Atalak-atalak nirya, aning atonun lyelamsulume.

²⁸Sik ti, tuba melibuka lyelolamlumba, nun apu yapu, sik ikin wamuk ning kum ubukop ura, kanye deibuka ulamik talak ara, adib aryuk tuba tamubuka, sikce malye ning ton tuba winilamik. Ara, ance, 'Aning ara malye winin ning ati ara, na like,' nyapdeiyamsulum ning ara, tuba tamubuka winilamik. Winibika ati, ance Israel ninye batakklamikce, yuk mutuku nang dam mikip arepnaba, sik olan nang arye olyangalamikce, Israel nang tuba tonap talilamikce, ikin ning sik nong deice delilamikba, ikin kanye bobuka engelumik.

Sik imun kanye bobuka engelumikce, "Se, Nun ni Allah, ance melipsilyame," nyabuka morolamik. Moropnop ura, an im deice arye kekebuka namin kilamlumce, sik ti fia bico tenelalum deice arye, Israel nang melina ati, sik noutamak bukni, yuk nang dam mikip deipnaba, sik olan nang binuka, obuka sirya daklamik. Obuka sirya dakne deice arye, Israel ninye lyelolamsulume. Ara, tonok talak aryuk kume. Atalak-atalak nirya aning atonun uk lyelolamsulume.

²⁹Israel ninye malye weik ulamik talak ara, sik ti ance asilen ning areplumce, "Na arye, 'Aning ara wininamlume, aning ara kum wininamlume,' nyabuka nyapse Mem Yupu, tuba tonap kekebuka dobolbanamlume. Winipmunce, teleb unamlum bukni, kumop ura, wenenamsine," nyapdeiyamlume. Nyabuka wenelalum bukni, mandipna kanye bobuka kwalilamikce, an nyalalum yupu yanibikce, sikce tenepne ning uk winilamik. Ance nyalalum yupu talye yaniplobuka bisina uk ulamik. Bukni, yatanye do nirya, ance, 'Aning ara wininamlume, aning ara kum wininamlume,' nyapdeiyamsulum yupu, moubuka kekeplirye,

dobolbilyop ura, anye bira dipkoprop kam unamle. Bukni, atalak ara, Israel nang arye, mandipna weik ulamikce, 'Allah el yupu ara fia kekena kumce wininamabe,' nyaltaklamikce, an tam donga anibna arye, yuk tam kilolamik. An yupu kum moubuka talyamika deice arye, fia malye weik ulamike.

³⁰Winibuka winilamika ani, ance aketeng tamun, aketeng tamun yupa weik noutam ara, sik malye ulamik ning ara, eibuka bikamlum bukni, sik ti yu asa arye, minop wenebuka kum oplomlume. Winilalumce, 'Sik malye wininyak ning ara, sik bidamnye arye kel biktinge' tenen, an Dib Kanye dobuka, nabi nang arepnaba, an yupu lak nyalamika deiyok nang, sik talima noutamak fil dolamukba, anabi nang deice arye, ance nyalilalumba, anang arye Israel ninye ati, 'Winina meme,' nyabuka wenelamik. An yupu lak nyabuka peteren nang arye, peterelamikce, wenelamik bukni, sik Israel nang, nun apu yapu arye, tuba kum kekelamik. Kum kekelamik ati, ance tamubuka yuk mutuku nang mikip areplumba, Israel nang olyangalamik. Ara, sik Israel nang ulamik mutuku tam nang arye, sik ti yanuka olamik.

³¹Sik yuk mutuku nang arye, Israel nang ati olyangalamik bukni, ance sik ti fia bico tenelalumce, kum batakamlume. Ance, 'Anang ara, fia malye nang anya arye, adib aryuk oplopnarne,' tenelamtum bukni, sik ti fia kum batakamlumba, yuk mutuku nang arye obuka, sirya kum dakamik. Nun ni Allah, anda dipkoprop ninye ati fia bico tenepsimince, tuba winalalak babye melisilyame. Nun malye winilamap touk, kum wenebuka osilyame. Mitiktonun uk wenesilyame.

³²Ati ara, winalalak ara nun Israel nang arye malye winilamupuba, ance fil weik dolamsulumce, lyelolamsulum ning ara, 'Aning ara mambul kume. Aning ara, daopnyake' tenen, kum bataknamisilyame. Malye winilamupu buk, ance ikin ning delilamsulum ning ara, tuba tenenamsilyame. Ara, nun winalalak unyap nang ikin usilye ning ap, nun weik ninye deiyok talibuka ulamik raja nang ati, ikin ulamuk ning ap, nun yupu bokolina deiyok nang ati, ikin ulamik ning ap, an si eren aik fum tam fil dona deiyok nang ap ati, ikin ulamik ning ap, an yupu lak nyana deiyok nang ati, ikin ulamuk ning ap, nun apu yapu ati ikin ulamuk ning ap, tuba tenenamsilyame.

Ura an mapu nirya ati, ikin ulamuk ning nirya ara, 'Aning nirya ara mambul kume,' kum tenenamsilyame. Sik Asyur mutuku ninye deiyok nang arye, nun ti talibuka, ikin ning nun nong deice delilamsikce, aniryu dipdongobuka, winalalak babye ikin usulul ning ati, 'Aning ara ikin kum tenenamsilyam' tenen, morokinyabe.

Nun ni Allah, anda weik mikipnye ulyame. Tonda, anda aning-aning deice tam ululnye ulyame. Tonda, yuk weik ning aupmalebuk, anda weik mambulnye tonok ulyame. Yuk ning nirya ara, mitik mambul uka. Ance

bico tenelamsulum deice arye, “Bico tenesununa anya arye, winibuka wininamsine,” nyapdeiamsulum ning nirya ara, dipkoprop winilyame. Tonok ning babye kum batakasilyame. Ance fia tuba melisilyame. Ati nun ikin usulul ning ara, tenepsimince, melinamsilame naio.

³³Naio, nun tenenyap ning ara, nyapnuyabe. Nunda malye-malye weik winilamupuba, ance nun wenena ati, ikin ning arelamsulum ning ara, diksukumuk ulalume. Anda malye un ning tonok ning babye kum ulalume. Ance, ‘Wininamsine,’ nyabuka nyalilamsulum yupu nirya ara, dipkoprop tuba winisilyame. Tonok ning babye kum bataklume. Nunda, malye weik ulamupu.

³⁴Nun kele, nun deiyok talipsik Raja nang ap, sik amutam bukni, nun yala deiyok nang ap, an si eren aik fum tam fil dona deiyok nang ap, nun apu yapu ap nirye arye, ance nyapdeiyamsulum yupu moubuka kum kekelamikce, malye weik winilamik.

Malye ulamik ati, ance, ‘Winina meme. Aning ara tuba winipmunyop ura, wenepnamsine,’ nyamsulum bukni, sikce aning nirya ara, kum kekelamik. Tonda, ance, ‘Aning ara wininamlume, aning ara kum wininamlume,’ nyapdeipsulum yupu ara, nun deiyok nang nirya kekena kumce, kum dobolbalamik.

³⁵Nun ninye deiyok nang aning talibuka, teleb ulamik talak noutam babye, ance arelamsulum ning, fia teleb ning dobuka winilamikce, pin-pin asa aryuk ulamik. Teleb ulamik bukni, atalak babye, Allah an ti, moubuka fia kum tenelamik. Fia teleb mutuku, pala weik mutuku arelamsulum ning ara, tuku teleb wamuk mutuku anya arye, aning-aning nirya teleb ubuka palamuk. Teleb uk ubuka ulamik bukni, atalak noutam babye, an amutam ulamikce, an fil tonok babye kum dolamik. Tonda, sik malye-malye winilamik nang ara, kum bataklamik.

³⁶Nun ni Allah, disulule. Nun apu yapu arye, fia malye weik ulamik bukni, nai nun winitalak unyap nang ara, an kele. Nunda yuk mutuku deiyok nang arye talisinyakce, ‘Nun fil talye fil doplulume,’ nyabuka, ikin fil arukusinyake. Amutuku noutam ara, ikin aryuk unyap bukni, ance nun apu yapu ati, amutuku dipkoprop areplume. Ara, ‘Na mapu, Israel nang ara, amutuku palamle ning nirya, libuka pin-pin asa arye dinamake. Tonda, amutuku yo duk nirya dakukabikirye, teleb kanye deibuka unamake,’ tenen, nun apu yapu ati, teleb mutuku arelamlume. Bukni, winitalak afil donyap ning nirya ara, yuk mutuku deiyok nang fil atibuk donyabe. Ati ance eilisilyame.

³⁷Ara, nun kele. Nun fia malye weik winilamupa deice arye, wenesilyame. Atuku deice wa winyaka nirya ara, weik paplirye, weik arye nong uliba linyap bukni, nun talisinyak deiyok nang, yuk mutuku deiyok nang aryuk alubuka dolonyake. Nun wenena ati, ance adeiyok nang dobuka, nun deice nyapdeamsulume. Anang arye, sik tenebikce

touk, nun ap, nun weinyap ning ap ati, mikip arye talisinyakce, ikin ning nun nong deice deilisinyake. Ati Nun ni Allah, aning-aning nirya ara, nun fia kanye imun usulule. Sik Lewi yala deiyok nang arye, ayupu nirya nyabikce, Allah ati morobik.

³⁸Aning nyabikop ura, ayupu ton dukdongobuka nyabik. “Aning nirya ara, nun ni Allah, nun Israel ninye nirye arye, nyalin yupu nyapnuyabe. Ara, nun Lewi yala deiyok nang ap, Israel ninye yupu bokolina deiyok nang ap, weik ninye deiyok talinyak nang ap, Allah an si eren aik fum tam fil dona deiyok nang ap nirye arye, ayupu nyabibirye, surat deice sekeipnuyabe. Sekeibiyop ura, adeiyok nang nirye arye, sik lak kilin ning ton, asurat deice deipnamabe. Deiyok ara, ‘Ayupu nirya nun dib tenenyaba anya arye, aning uk wininamabe,’ tenena ati, sik si asurat deice seknamabe.

Ayupu ara, winitalak aryuk nyapmabe. Nun nirya arye, an nyapdeiyamsulum yupu, Mem Yupu moubuka kekebibirye, ayupu talibuka dobolbanamabe. Nyapdeibape.” Sik Lewi yala deiyok nang ap, sik Israel yala nang ap nirya arye, neika nyabikce, ayupu sekdeibik.

Israel ninye nirye arye, “Allah nyapdeiyamsuk Mem Yupu moubuka kekebibirye, ayupu talibuka dobolbanamaba ati, nun si sekna ning deice sekuka deipnuyabe,” nyabik yupu

10 ¹Hakailya el mi Gubernur Nehemia, elce minopce lak kilina ati, el si sekna ning deice sekuk. Ara, meterai delilamak ning deice tanda tangan kina ati, sekuka lak kililamaka atonun, akunum winipdeibuk. Winibuk ura, aminyan talak el dam bulubuka yayikce, dukdongobuka sekik nang sik si ara ani. ²⁻⁸Zedekia ap, Seraya ap, Akasarya ap, Yeremia ap,

Pasyhuri ap, Amarya ap, Malkia ap,

Hatus ap, Sebanya ap, Malukh ap,

Marim ap, Meremot ap, Obaya ap,

Daniel ap, Gineton ap, Barukh ap,

Mesulam ap, Abia ap, Miyamin ap, Maasya ap,

Bilgai ap, Semaya ap, tanda tangan kina ati, sekuka lak kililamaka atonun, akunum winipdeibik. Anang nirya ara Allah el si eren aik fum tam talibuka fil dona deiyok nang imam ulamik.

⁹Aning atonun, Allah el aik fum tam fil dona deiyok nang, sik melin nang ara, Lewi yala nang ulamik. Sik aseknang ning deice sik si sekuka deibik Lewi yala nang, sik si ara ani. Ara, Hazanya el mi Yesua ap, Henadad birye deiamukba, dadeipdanin yangalamik nang arye yanuka deibiknye, Binui ap Kadmiel ap, sik si sekdeibik. ¹⁰Tonda, aninye sik kwit capu nang koprop atonun nang, sik si ara, Sebanya ap,

Hodia ap, Kelita ap, Pelaya ap, Hanan ap,

11 Mikha ap, Rehob ap, Hasabya ap,

12 Zakur ap, Serebya ap, Sebanya ap,

13 Hodia ap, Bani ap, tonda Beninu ap, sik aLewi yala ninye nirye arye,
tanda tangan kina ati, sekuka lak kililamaka atonun, asurat deice
arye akunum winipdeibik.

14 Amutuku noutam talibuka ulamikirye, 'Yupu nyanamak' tenen,
wipdeiamik nang sik si ara ani. Ara Peros ap, Pahat-Moab ap, Elam ap,
Zatu ap, Bani ap,

15 Buni ap, Azgad ap, Bebai ap,

16 Adonia ap, Bigwai ap, Adin ap,

17 Ater ap, Hizkia ap, Azur ap,

18 Hodia ap, Hasum ap, Besai ap,

19 Harif ap, Anatot ap, Nebia ap,

20 Magpias ap, Mesulam ap, Hazir ap,

21 Mesesabeel ap, Zadok ap, Yadua ap,

22 Pelaca ap, Hanan ap, Anaya ap,

23 Hosea ap, Hanannya ap, Husub ap,

24 Haloresh ap, Pilha ap, Sobek ap,

25 Rahum ap, Hasabna ap, Maaseya ap,

26 Ahia ap, Hanan ap, Anan ap, 27Maluk ap, Harim ap, tonda Baana ap,
sikce amutuku noutam talibuka ulamik. Anang nirye arye, tanda
tangan kina ati, sekuka lak kililamaka atonun, asurat deice arye
sik si sekuka akunum winipdeibik.

28 Ura, adeiyok nang nirye arye, asurat sekne ning deice, sik si akunum
sekikop ura, Nehemia birye nyabuk.

Sik Israel ninye nirye arye, 'Allah el yupu uk moubuka kekebibirye,
aning uk talibuka diksukum unamap' tenen, bikilina ati, sik si nirya
kum seknuyak bukni, sik deyok kouna ati, ninye deiyoknye, na Gubenur
Nehemia birye, 'Anyalin yupu dipkoprop wininamap' tenen, na si
akunum sekmane.

Aning atonun, Allah ap, ninye ap, ansinilina deiyok nang, ara Allah
el si eren aik fum tam fil dona deiyok nang, sik imam nang nirya, sik
si ton sekmake. Tonda, Allah el si eren aik fum fil dona deiyok nang,
sik amutam fil melibuka don nang ara, sik Lewi yala nang ton, sik si
sekmake. Tonda, Israel ninye, sik deiyok nang yupa weik 44 nang, sik si
sekmake.

Anang-anang nirye arye, 'Nun dipkoprop anyalin yupu winipnamnyap'
tenen, lak kilina ati, sik si sekmake. Tonda, anggun Israel ninye weik
arye, Nun ni Allah arye, 'Aning ara wininamlume, aning ara ton kum
wininamlume,' nyabuka, areyamsulum mem yupu, 'Aning uk talibuka
unamap' tenen, winipmake. Sik dana-dana tam ulamikce, Allah ati dib
kum tenelamik ninye ulamikak batakuka, yuk tam kiprobik. Ara, 'Yuk

mutuku nang arye, sik malye wininyak ning, nun ton eibibirye, amalye winin ning nun ton winibiyak' tenen, yukak libuka biyik. Yuk mutuku ninye ap, ansinibuka kum ulamik.

Winibuka ulamik nang ara, Allah el si eren aik fum tam fil dolamika deiyok nang ap, sik amutam fil melin nang, Lewi yala nang ap, anang sik amutam bukni, anyaik talye fil melin nang ap, Allah mot nyalamik nang ap, Allah el si eren aik bublan dam kalikin deiyok nang ap, anang-anang nirya, sik kilapu ap, sik kil mapu ap, sik sal mapu ap, kanye akunum bomik mapu nirya ara, sik bidamnye arye, 'Anyalin yupu ara, nun yuk arye, aning uk talibuka unamap' tenen, nyalin yupu deice arye, akunum nyanmake.

²⁹ Aninye nirye arye sik si sekik ninye ap, nyalin yupu deice arye nyapmek ninye ap, awinipmek ning deiyok ara ani. Ara, nun Ni Koprop Allah arye, 'Aning ara wininamlume, aning ara kum wininamlume,' nyabuka, el amutam fil dolamuknye, bira 'Nun apu koproba Musa biti aripsuk mem yupu nirya ara, moubuka talibibirye, aning uk kekebuka unamap' tenen, sik si sekmake. Tonda nyalin yupu deice arye, "Wininamabe," nyanmake. Tonda, sik aninye nirye arye, nyanmake. "Allah el si deice arye nyapmabe. Allah arye nyapdeiamsuk yupu kekebuka, aning dipkoprop kum winibiyop ura, nun wenena ati, 'Allah arye, kanye imun weik ning nun nong deice deipsutue,' nyapmake.

Tonda, 'Nun yala Israel ninye deiyok nang yala-yala nirye arye, nun Ni Koprop Allah, el si Yahweh, nun weik deiyoknye usulula ati, Allah arye, 'Aning ara wininamlume, aning ara kum wininamlume,' nyapdeiamsuk yupu, el yupu uk moubuka kekebibirye, aning uk wininamabe,' nyabuka, lak kilina ati sik si sekik touk, 'Nun babye atonun wininamap' tenen, sik nirye arye, 'Winibuka unamabe,' nyalin yupu deice arye nyapdeipmake." Nehemia birye nyabuk.

³⁰ Atalak ara, ayupu akunum nyabukop ura, abulubka wekmek ninye nirye arye, ayupu ton nyabik.

Nun Israel ninye nirye arye, nun Ni Koproba Allah ati, 'Wininamabe,' nyalin yupu ton dukdongobuka nyapnuyabe. Anyalin yupu ara ani. Ara, sik yuk-yuk yala ninye nun dana-dana tam unyak nang arye, delinamak kil mapu ara, nunce nun mapu kil dolana ati, kum donamabe. Tonda, nun mapu sik kilapu ati kum donamabe. Tonda, nun kil mapu ara, sik yuk-yuk yala ninye, sik mapu kil dolana ati ara, fia kum arenamabe.

³¹ Tonda, nun dana-dana tam unyak ninye, yuk-yuk yala nang arye, nun fil kum donyap sum, Sabat sum deice ara, dekna ning, talye bona do, din ning do nirya, 'Aning-aning deknuyap' tenen, nun dam boyasicop ura, nunce kum deknamabe. Ara, nun Ni Koproba Allah el si erena ati, mambul sum, Sabat sum deice arye fil kum donyaba ati, dekna ning boyasica babye, nun kum deknamabe. Aning atonun, an Allah arye, 'Arup sum ara, na mambul

sum anya arye, asum deice arye, na si erepnamnulume,' nyapdeipsulum sum nirya ara, atonun wininamabe. Fil dona ap, dekna ap kum winipnamabe.

Tonda, keteng tamun nukdebuka, naku barye keteng tamun deice arye, talye wa wibuka, linamabe. Bukni, keteng tamun nukuka tek barye akunum uplyop ura, tahun ke-tujuh (7) nirya ara, nun winiryuk wa kum wipnamabe. Tonda, nun wa tuku noutam ara, yala kum koupnamabe. Talye awamlye ning uk, talye palamle ning libuka dinamabe.

Ara, mince nyapdeiamsulum touk, keteng tamun tek barye deice arye, nun tuku ap, wa ap nirya ara, dikdik sena atonun kipnamla atia. Tonda, yuk nang arye, nun uang yo bok do, yata ning do, tia ati dopropsik ning ara, tek barye keteng tamun deice arye, 'Aning dauplye. Nun ning, tia ati dopromsulum ning nirya ara, tuba tamubuka arina kume,' nyapnamabe.

³²Tonda, an Allah arye nyamsulum touk, kekebuka wininamabe. Ara keteng tamun, keteng tamun nirya ara, nun dekna deiyok ning, el si ara perak, tonok ning bokuka, seper tiga bokuka, arenamabe. Ara winipmanto 4 gram kintinipdeibibirye, Allah el si eren aik lipsisikildeilina ati, Yerusalem dolinamabe.

³³Auang yo bok bulupmakce, adeice arye yuk wininamak ning ara ani. Ara, arup ning atonun, ance, 'Wininamlulume,' nyamsulum touk, fil dona kumce, nun Sabat sum deice nirya ara roti din ning 12 kibuka dabuka, an mambul si eren aik fum tam bukni, yolana deice delilbanamabe. Aning atonun, ance, 'Atalak ara, aning arenamnulume,' nyamsulum touk, roti deiyok ning, el si gandum do, yuk yala ning do, aripnamkiyabe. Tonda, nun malye winina ati, talye mangkau asa arye oplopsutum bukni, nun punun ning ati, 'Gam ning obuka uku dapmunce, arenamnulume,' nyamsulum touk, tuba wininamabe.

Tonda, Sabat sum deice arekinyap ning ap, tonda wala tikin talak weik kwalina yubuka an ti arekinyap ning ap, tonda ance, 'Asum-asum nirya weik kwalina yunamlume,' nyapdeiamsulum ning ap, tonda fia teleb ning, an ti teleb ning arekinyap ning ap, tonda nun malye winin ning kum danalina ati, arekinyap ning ap, fia kum bataknamabe. Ance, 'Aning-aning nirya winibuka arenamnulume,' nyamsulum touk aripnamkiyabe. Aning nirya ara, ance nun ti, 'Sik aninye ara, wenebuka kum opnamne,' tenepsuluma ati, nun punun ning ati arekinyap ning kanye deibuka dololyame. Ati, nai an si eren aik fil aning-aning nirya dolamice ning ara, kum bataknamabe. Tuba fil dona uk unamabe.

³⁴Tonda nun Ni Koprop Allah, an si eren aik fum tam fil dona deiyok nang ap, nun fil melin nang, sik Lewi yala nang ap, ura nun Israel ninye nirya ap ara, nun nirye arye lak kilin ning akunum winipmabe. Ara, 'Yata yala nang arye, Allah el aik dam uku sekenamakak deilina ati, yo webuka boyanganmak do? Tonda dan talak arye, yuk yala nang arye boyanganmak do?' tenen, lak kilin ning akunum wipdeibupu.

Akunum winibupu anya arye, winitalak nun kele. 'Ayala nang ara, aketeng tamun noutam, ton sum wala ara, asum deice arye, Allah el aik dam uku sekenamakak ati, yo toubuka boyanganamake. Tonda yuk talak ara, yuk yala nang aryük, yo toubuka boyanganamake,' utenena ati akunum kel bikupe. Winibuka boyacop ura, Allah arye nyalamukba, Musa birye Mem Yupu buku noutam sekeipsuk touk, Allah el si Yahweh, el si eren aik dam bukni, kam ning obikirye, keil yangabuka deililamakak, aning deice uku seknamakak ara, ayala-ayala nang yuk-yuk arye, yo boyanamake.

³⁵Tonda, aketeng tamun aketeng tamun nirya ara, nun wa koulamap ning ap, nun ning duk moulamle li talak ara, min yuma ning ara, libukabibirye, an ti arilyanganamkiyabe. Ara, nun ni Allah an si Yahweh, an si eren aik dam, nun winiryuk ning nirya ara libuka boyanamabe. Afil babyte kum bataknamabe. Dona uk wininamabe.

³⁶Tonda, Allah ance nyalamlumba, Musa birye sekeiamsuk touk, nun min yuma ning aning-aning nirya, an si eren aik dam boyanganamabe. Ara, nun min yuma mapu ap, nun sapi basam min yuma delinamak ning ap, nun domba do, kambing do, min yuma delinamak mi, aning nirya ara, an aik dam boyanamabe. Ara, an si eren aik fum tam fil dona deiyok nang, sik dam boyabirye, anang fil dolamice talak, sik dam deipnamabe.

³⁷Aning uk kum bukni, an aik fum tam fil dona deiyok nang, sik dam boyabirye anang ati arenamap ning arebibiba, doprobikirye, an aik fum tam mambul ning dokola delilamakak ton, delinamake.

Aning ara, ani. Ara, nun roti dana deiyok ning gandum do, yuk yala ning do, teikikiba atue atonun uplye ning ap, tonda teikina kum ning ap, yo duk moulamle duk aning-aning nirya ap, anggur duk purubikiba, winiryuk mek ap, tonda, zaitun yo duk teikikiba, minyak zaitun balamle ning ap ara, kwebuka boyanamabe.

Aning uk kum bukni, an aik fil dona ati melina deiyok nang, sik Lewi yala nang arina ati, nun wa wibuka koulamap ning ayala-yala nirya, boyanganamabe. Tonda, wa win dam arye libibirye, aning nirya, noutam bokuka yuk-yuk tagu barye deibibirye, tonok ning, seper sepuluh (10%) nyalamak ning, doprobibyop ura, sik Lewi yala nang, sik melina ati arenamabe. Ara, urdem ati kume, deiyok ara sik Lewi yala nang arye, nun binuka fil donyap mutuku noutam nirya ara, nun bokuka arenyap ning, seper sepuluh (10%) ning bulubuka delilamaka ati, anang dam aning arenamabe.

³⁸Nun kele, nun apu koprop Harun birye deibukba, dadeipdanin balamika ani, deibik yala nang nirya, deipkirikdoba nang arye, sik Lewi yala nang ap, arup nyanmap fil donamak talak ara, anang melibuka donamake. Ara, sik Lewi yala nang arye nun arenamap ning, arelyangalamap talak nirya ara, Harun el yala nang arye delilamik nang, Lewi yala nang ap melibuka, afil donamake.

Nun arenamap ning, sik Lewi yala nang arye doprobikcop ura, aning nirya bulubuka deibikirye, noutam bokuka, tagu barye ton deibicop ura, tonok ning ara seper sepuluh (10%) dobuka, Allah an si eren aik boyanamake. Ara, an si eren aik fum tam, mambul ning dokola deilin aik dongobuka deipnamaka atia.

³⁹Ati, nun Israel ninye nirya ap, tonda sik Lewi yala nang babye, nun Ni Kopro Allah arina ati, aning ayala-yala nirya boyanganamabe. Ara nun roti dana deiyok ning gandum ap, anggur mek winiryuk ning ap, minyak zaitun winiryuk ning ap, libibirye, Allah an si eren aik dam deibipyop ura, anyaik fum tam mambul ning ati, dokola deilin aik deipnamake.

Mambul ning deililamak aik fum tam ara, Allah el si eren aik fum tam fil dona ati, weik mambul ning ton, imam nang talinyak ning dokola deilinamak. Tonda anyaik dam ara, sik bublan dam kalikin nang ap, sik mot sen nang ap, anyaik fum tam fil dona deiyok nang, sik imam-iman nang ap, anyaik fum tam ton unyake.

Ati, nun ni Allah, an si eren aik ara, kum bataknamabe. Ance, 'Wininamlulume,' nyamsulum touk, aning-aning nirya anyaik dam boyangana uk unamabe. Ati, ayupu nirya ara, nyalin yupu deice arye, nyapdeipmabe. Ara an ap, nun ap, neika teleb una ati nyalin yupu asukum deibabe. Sik Israel nang ap, sik deiyok nang ap, nirye arye, Allah ati ayupu nyapdeibik.

**Yerusalem mutuku noutam unyak ninye ati, si sekna ap,
Yehuda yala ninye si sekna ap ati, nyabuk yupu**

11 ¹Yerusalem mutuku noutam talibuka ulamikirye, yupu talinyak nang ap, amutuku noutam unyak ninye nirya arye, 'Dekna doproprnamap' tenen, dolamak ning el si ara, undi donamlume. Undi donmamun bukni aning arye akunum kintiniplye ura, tonok mapu silip tagu barye atonun, afia teleb mutuku Yerusalem binuka wekikirye unamake. Bukni, aning undi donmakibuk, atonun kum winiplirye, wibuka kum deiplye ninye ara, Yerusalem mutuku ton kum unamake. Yuk-yuk mutuku uk daunamake. ²Anoutamak kan-kan arye wipdeibikiba, talye mangkau kanye bobuka Yerusalem mutuku noutam unamak ninye nirya ati, yuk ninye arye si erenamake.

³Tonda Israel yala ninye yuk-yuk mutuku daukirye, Lewi yala imam-imam nang, Allah el yupu aik fum tam fil don nang ap, Salomo ap ulamikce, el fil melibuka dolamik ninye nirya ara, sik mutuku koproba kibuka akunum unyake. ⁴Ura, Yehuda yala ninye ap, Benyamin yala ninye ap, Yerusalem mutuku noutam unyak ninye sik si ara ani. Ara, Yehuda yala ninye sik amutuku nang ati, Uzia el mi Ataya, elda Zakaria birye deibuk noutam sik apu yapu ara, yata wiribukap do, ara, Amarya ap, Sefaca ap, Mahalalel ap, Peres ap, sik winibuka ulamik.

⁵Yehuda yala ninnye ara, yupa fia weik 486 ninnye ara, fia mikip kanye bobuka, ilil kum ninnye ulamik. Baruk el mi ara, Mahasea elce deibuknye bira Kolhoze, el li bira Hazaya el li bira Adaya, el li bira Yoyarib, el li bira Zakaria. Sik anang niryra ara, Syela birye deibukba, dadeipdanin yangalamik nang ulamik. ⁶Peres birye deibukba, dadeipdanin balamikce, Peres yala ninnye fia weik Yerusalem mutuku ulamik. Aninye yupa ara ani, 468 ninnye ara, mikip weik ubuka, ilil kanye kum bolamik ninnye ulamik.

⁷Benyamin yala ninnye ara ani. Mesulam el mi Salu, Mesulam el li koproba Yoed, Yoed el li koproba Pedaya, Perdaya el li koproba Kolaya, Kolaya el li koproba Maseya, Maseya el li koproba Itel, Itel el li koproba Yesaya ulamuk. Winibuka nang ulamik. ⁸Tonda, Gabai ap, Salai ap, sik niryra ara, mining dam anyuk Salai ap, sik niryra dukdongopdanuka ulamik. Aninye sik yupa fia weik 928 ninnye talibuka ulamik. ⁹Zikria el mi Yoel bira, amutuku ninnye talibuka ulamuk. Tonye bira Hasenua, el mi Yehuda ap, sik bitinye talyamdik.

¹⁰⁻¹¹Anang winibuka talyamika noutam arye, Allah el aik noutam fil melibuka don nang imam nang ara, Yoyarib el mi Yedaya ap, Yakin ap, tonda Hilkia el mi Seraya ap, Zadok el mi Mesulam ap, Ahitub el mi Merayoy ap, sik niryra ara, weik nang ulamikce, Allah el yupu aik noutam talibuka fil dolamik. ¹²Ura, Allah yupu aik fum tam talibuka fil dolamik nang imam-imam sik yupa fia weik 822 nang ulamik. Anang sikce dadeipdanin yangalamik nang ara ani, Yeroham el mi Adaya elce deibuknye Pelaya ap, Zakaria el mi Amzi ap, Malkia el mi Pasyhur ap ulamik.

¹³Aning atonun, sik ap neika dukdongobuka ulamik nang sik yupa ara, fia weik 242 ninnye ulamik. Asareel el mi Amasai, tonda Minop talak arye, deibukba dadeipdanin yangalamik nang ara, Mesilemot el mi Azai, el li Imer ap ulamik. ¹⁴Tonda olana ap, 'Aning niryra winipnuyabe,' tenena ap, mandipna kanye bobuka ulamik nang ara ani, 128 ninnye ulamik. Sik deiyok talibuka, 'Wininamabe,' nyalamuknye, el si ara Gedolim, el mi Zabdiel ulamik.

¹⁵Allah el yupu aik talibuka, fil dona deiyok nang Lewi yala nang ara ani. Hasub el mi Semaya. Hasab el li ara, Azrikam. Azrikam el li ara, Hasabya. Hasabya, el li ara, Buni ulamuk. ¹⁶Tonda, Sabetai ap, Yozabat ap, sik winibuka Lewi yala nang ara, fia weik nang kibuka, Allah el si erena aik, bai tam bukni, anyaik dam talibuka, fil dona deiyok nang ulamdik. ¹⁷Winibuka ulamikce, Mika el mi Matanya ap, Lewi yalanye ulamuk. Asaf el mi Sabdi ap, sikda Allah ati kanye debuka, mot nyana ap, Allah morona ap ati, deiyok nang kibuka ulamik. Sik anang arye, 'Wininamabe,' nyapne touk winilamik. Tonda aminyan wibiknye el si, Bakbukya bira, el kwit Syamua, el mi Abda ap, Yedutun birye deiamuknye Galal ap, sik uk dukdongobuka neika ulamik.

¹⁸Sik Lewi yala nang fia teleb mutuku noutam anyuk ulamik nang yupa ara, fia weik 282 ninye ulamik. ¹⁹Aning atonun, amutuku asik bisik bublan dam kalikne nang ara, yupa fia weik 172 nang kaliklamik. Sik kalikmik nang ara, Akub ap, Talmon ap, sik kwit capu nirya kaliklamik. ²⁰Israel ninye yupa fia weik ulamik touk Lewi yala nang sik Imam nang babye fia weik tonun ulamika, anya arye Yehuda mutuku tam nirya ara sik mutuku koproba atonun kibuka ulamik.

²¹Bukni, sik fil melibuka dona ati, Allah yupu aik noutam ulamik nang sik ulamikak ara Yerusalem mutuku noutam bukni, asukum mutuku el si ara Ofel mutuku nyalamikak uk, sik deiyok nang Siha ap, Gispa ap, talibuka ulamdikba, asukum uk bululbalamik. ²²Allah yupu aik fum tam talibuka fil dona ati, Lewi yala nang sik Yerusalem mutuku Allah yupu wekna arye, Allah yupu keken talak ara, mot sena ati olamak ning gitar ati, 'Winibuka nyanamabe,' nyan nang, sik si ara ani. Bani el mi Uzi ap, elce deibuknye bira, Hasabya. Anoutam ulamik nang sik apu yapu ara, Mika el mi Matanya bira, Asaf birye deiamuknye.

²³Sik anang arye, talibuka dolamik fil ara, atalak-atalak nirya Allah yupu aik weknarye mot sena ati olamak ning gitar ati, kintinilina ap, tonda ninye deiyok nang, Raja biti, 'Wininamak ning ara ani,' nyamuk touk winilamik.

²⁴Aning atonun, Mesesabeel el mi Petahya bira, Zerah yalanye Yehuda el mi ara, ninye deiyoknye Raja el dam melibuka ulamukce, Israel ninye Persia mutuku ninye deiyoknye bulamuk amutam ulamik ninye nirya ati, yupu nyalamuk.

Yuk-yuk mutuku daulamik ninye ati nyabuk yupu

²⁵Sik yuk-yuk unamak mutuku nirya ara, wa win dam uk unamake. Yata wiribuka nang do nirya, Yehuda yala nang mutuku unamak ninye ara eitam, Bersyeba mutuku ap, Dibon mutuku ap Yekabzeel mutuku ap, amutuku nirya unamake.

²⁶Yosua ap, Maloda ap, Bet-pelet ap,

²⁷Tonda Hazar-Sual ap, Beryeba ap, amutuku noutam arye dipdongobuka mitik mutuku nirya atia.

²⁸Ziklang mutuku ap, Mekhona mutuku ap, amutuku noutam unyak ninye nirya atia.

²⁹En-Rimon mutuku ap, Sora mutuku ap, Yarmut mutuku ap atia.

³⁰Zanoah ap, Adulam ap, Azeka ap, Lakhis ap, tonda Bersyeba mutuku bukni, Hion mutuku dam danoutam nirya unyake. ³¹Benyamin yala nang unyak mutuku noutam daunyak ninye nirya ara, yata barye nang unyak do? Amutuku noutam unyak nang ara ani. Geba ap, Mikmas ap, ulamdik. Tonda, Ai mutuku nang ap, Betel mutuku dana-dana mitik asik dobuka unyak nang nirya atia.

- 32 Anatot ap, Nob ap, Ananya ap,
 33 Hasor ap, Rama ap, Gitaim ap,
 34 Hadid ap, Zeboim ap, Nebalat ap,
 35 Lod ap, Ono ap, aik don nang unyak ap,
 36 Lewi yala nang yupa yata barye unyak do? “Yehuda tam min kum
 ulamik talak arye Benyamin yala ninye unyak tam ton unamlume,”
 nyanamlume. Ara, Benyamin yala nang anggun ap, neika una atia.

**Imam-imam nang ap, Lewi yala nang ap,
 sekdeiyamik ning ati nyabuk yupu**

12 ¹Asekeipne ning ara, imam-imam nang ap, sik Lewi yala nang
 ara, Babel mutuku nang arye bobalamikba, daulamika ani,
 aminyan talak ara Sealtiel el mi Zerubabel ap, Yesua ap, sik ulamik
 mutuku koproba tamubuka yayik talak ara, anang ap neika yayik. Sik
 si ara ani. Seraya ap, Yeremia ap, Esra ap, sik nirya Yerusalem mutuku
 tamubuka yayik. ²⁻⁷Aning atonun, anang babye neika tamubuka yayik.
 Sik si ara, Amarya ap, Malukh ap, Hatus ap,
 Sekhanya ap, Rehum ap, Meremot ap,
 Ido ap, Ginetoi ap, Abia ap,
 Miyamin ap, Maaja ap, Bilga ap,
 Semaya ap, Yoyarib ap, Yedaya ap,
 Salu ap, Amok ap, Yedaya ap,
 Hilkia ap, Yedaya ap, sik anang nirya ara, imam deiyok nang uamik
 nang ara, sik weik deiyoknye Yesua ulamuk talak ulamik nang
 atia.

⁸Allah el si eren aik fum tam fil dona deiyok nang, sik melilamik nang,
 Lewi yala nang sik Yerusalem mutuku tamubuka yayik nang si ara ani.
 Ara, Yesua ap, Binuai ap, Kadmiel ap, Serebya ap, Yehuda ap, Matanya
 ap, ulamik. Matanya ap, el kayapu nang ap arye, Israel yala ninye yuk-
 yuk bulubuka wekmanak uk, mot sepra bana deiyok nang ulamik.

⁹Mot selamik talak ara, tia talak ati sikce ninye yuk-yuk bulubuka
 wekmanak uk, mot sebuka melilamik nang ara, sik si ani. Ara, Bakbukya
 ap, Uni ap, sik kayapu yuk nang nirye arye, winibuka ulamik. ¹⁰Imam-
 iman nang, sik fil melina ati, deiyoknye Yesua bira, elce deibuknye el si
 ara, Yoyakim ulamuk. Yoyakim birye deibuknye bira el si ara, Elyasib
 ulamuk. Elyasib birye deibuknye bira, el si Yoyada ulamuk.

¹¹Atonun tonda, Yoyada birye deibuknye el si ara, Yonatan ulamuk.
 Yonatan birye deibuknye el si ara, Yadua ulamuk. ¹²Deiyoknye Yoyakim
 ulamuk talak ara, Allah el si eren aik fum tam fil dona deiyok nang,
 sik asik yuk-yuk ulamika deiyok nang si ara ani. Ara, weik deiyoknye
 Yoyakim el fil don dam talibuka fil dolamik nang, sik mapu silip deiyok
 nang si ara ani. Seraya el mapu silip sik deiyoknye bira, Meraya ulamuk.

- Yeremia el mapu silip sik deiyoknye bira, Hananya ulamuk.
 13 Esra el mapu silip sik deiyoknye bira, Mesulam ulamuk.
 Amarya el mapu silip sik deiyoknye bira, Yehohan ulamuk.
 14 Melikhu el mapu silip sik deiyoknye bira, Yonatan ulamuk.
 Sebanya el mapu silip sik deiyoknye bira, Meraya ulamuk.
 Seraya el mapu silip sik deiyoknye bira, Yusup ulamuk.
 15 Harim el mapu silip sik deiyoknye bira, Adna ulamuk.
 Merayot el mapu silip sik deiyoknye bira, Helkai ulamuk.
 16 Ido el mapu silip sik deiyoknye bira, Zakaria ulamuk.
 Gineton el mapu silip sik deiyoknye bira, Mesulam ulamuk.
 17 Abija el mapu silip sik deiyoknye bira, Zikri ulamuk.
 Minyamin ap, Moaja ap sik mapu silip sik deiyoknye bira, Piltai
 ulamuk.
 18 Bilga el mapu silip sik deiyoknye bira, Syamua ulamuk.
 Syamua el mapu silip sik deiyoknye bira, Yonatan ulamuk.
 19 Yoyarib el mapu silip sik deiyoknye bira, Matnai ulamuk.
 Yedaya el mapu silip sik deiyoknye bira, Uzi ulamuk.
 20 Salu el mapu silip sik deiyoknye bira, Kalai ulamuk.
 Amok el mapu silip sik deiyoknye bira, Heber ulamuk.
 21 Hilkia el mapu silip sik deiyoknye bira, Hasabya ulamuk.
 Yedaya el mapu silip sik deiyoknye bira, Netaniel ulamuk.

[Asukum ara minop talak sekeiamsik buku noutamak ara, ayat 22 sampai 26 ton aubuk. Anoutamak ara Lewi yala nang ap, Allah el si eren aik fil don deiyok nang ap, sik si weik ton sekeiamsik bukni, aning kum sekupu. Ati abuku dukdongobuka nyapnin banamlumak ara, ayat 27 arye nyapnin banamlulume.]

**Nehemia birye, Yerusalem mutuku winiryuk dobik foka ati, Israel
 ninye nirya bulubdeibikke, “Kibuka si erenamabe,” nyabuk yupu**

27 Ura, “Yerusalem mutuku tuba tamubuka dobupu cang keil foka ati, kwalina yubuka si erenamabe,” nyabuka Nehemia birye Lewi yala deiyok nang ati deiyok koubuk. Tonda ayupu nyabuk. “Sik Lewi yala nang yuk-yuk aulamik touk, Yerusalem mutuku bulubuka yamunce, anggunce, ‘Winipnuyabe,’ nyabuka winipnin bamunye touk, sik yuk ninye nirya aning uk melibuka wininamake. Ara, Allah ati kanye deibuka teleb nyan mot sena ati, nyan ning bung-bung ana, el si ara gambus ap, kecapi ap bobibirye, mot sebuka si erebibirye, banamabe,” nyapdeibuk.

28 Aning atonun, sik Allah el yupu mot sena kel ninye ton yukubukop ura, anang arye Yerusalem mutuku arye dipdongobuka mining dam mutuku ulamik ninye ap, Netofa mutuku ulamik ninye nirya bulubikke, Yerusalem mutuku tamubuka mot selamik. 29 Tonda, Bet-Gilgal mutuku ap, Geba mutuku ap, Asmawet mutuku ap nirya arye, mot sena weik kel ninye ara, Yerusalem mutuku uk bulubuka yayik. Ara, Babel mutuku arye

tamubuka yayik talak ara, amutuku-amutuku noutam sik aik dobuka ulamikak ara, amutuku arye tamubuka, Yerusalem mutuku dam yayik.

³⁰Minop talak ara, Allah arye sik imam nang ati nyabuk. “Na si eren aik fum tam wekelbinamunye talak ara, anggun nong ap, anggun talilulum ning ap, anyaik fum tam fil donamlum ning ap, aning-aning nirya teleb ubdeipmunce, malye winina kum nang uk upmunyop ura, atalak aryuk, na aik wekna telebe. Ara, aning-aning nirya fia malye ulina ati nyapsine,” nyapdeibuk. Nyapdeibuka ati, sik imam-iman nang ap, Lewi yala nang ap ara, ‘Allah arye nyapsuk touk winipnamapca’ tenen, kintinipdeibikke, aning ap, sik nong koprop ap ati, teleb kipdeibik.

Aning atonun, ‘Nun amutam ninye nirya babye, malye winina kum nang uk upnamak’ tenen, Allah arye ‘Wininamlulume,’ nyapdeiamuk touk, teleb fil dobuka kintinibik. Winibik ning ara, weik keil foka donmek ning ap, afoka bublan botopdeiamik ning babye, ‘Fia teleb, malye ton kum upnamle’ tenen, afil uk dobuka kintinibik.

³¹Atalak ara, na Nehemia birye winipse. Sik Yehuda mutuku deiyok nang ati, ‘Winiplulume,’ nyapsiba acang keil foka deice welebikke, neik diksukum tikikke kintinibik. Winibikop ura, akeil foka deice tam amutuku nirya antanapdongobuka, denepdongobik. Tonda, ‘Allah el si erena ati kanye delin mot sepra banamak’ tenen, ninye yupa weik bitinye kipreipsiba, akeil foka deice banmek. Yupa tonok ning ara, weik cang keil foka deice tam, sirik tam arye neik diksukumuk banmekce, domba basam dei ap, sikce talibuka wilamik yuk yala ning dei ap, dolkwetelban bisik bublan dam biyik.

³²Winibuka banmekka sik donga tam ara, yuk nang ap tabakuka banmek. Sik si ara ani. Ara, Yudea tam deiyoknye el si ara, Hosaya banmokba, Yehuda yala ninye sik ninye deiyok nang noutam arye bokuka, yupa ton banmekce, mot sepnin banmek.

³³⁻³⁵Atalak sik deiyok nang banmekba, aminyan dukdongobuka banmek nang sik si ara, Asarya ap, Esra ap, Mesulam ap, Yehuda ap, Benyamin ap, Semaya ap, Yeremia ap banmek. Aning atonun, sik donga tam dukdongobuka banmek nang ara, imam-iman nang ton pong-pong ana, el si ara terompet yupu sepnin banmek. Sik ap banmek nang si ara, Yonatan el mi Zakaria ap, Semaya birye deiamuk mi ap, Mataya birye deiamuk mi ap, Zakur birye deiamuk mi ap, Asaf birye deiamuk mi ap, sik kayapu nang ap, neika banmek.

³⁶Atonun, sik anirye dukdongobuka aminyan tam tikuka banmek nang ara ani. Semaya ap, Asareel ap, Milalai ap, Gilalai ap, Mahai ap, Netaniel ap, Yehuda ap, Hanani ap, banmek. Sik anang nirya ara, mot sen ning aning-aning nirya bopmekce, banmek. Ara, minop talak Allah el fil donanye, Raja Daud birye, ‘Wininamlulume,’ nyapdeiamuk atonun winibuka unmek. Tonda Allah arye, “Wininamlulume, aning ara kum

wininamlume,” nyapdeiyamuk yupu talibuka seklamuknye, el si ara Esra, elce menekuka banmokba, sik aninye nirya, el donga tam banmek. ³⁷Sik nirya banmeka ani, mek pu dam balamik bisik otam biyicke, Raja Daud el ulamuk mutuku dam bana ati, moropdeiamik bisikak obinuka foka kwanibuka dopdongamikak obinuka keplamapdongobuka, keteng yangan tam, mek pu dam balamik bisik bublan deice tam biyik.

³⁸Sik anang nirya ara, anyapman touk banmekce, mot senmek bukni, ninye weik yupa bitinye ning ara, kwanim tam banmek. Ara, na Nehemia ap, Israel ninye noutam arye bokuka yupa weik tonun tonap, sik mot senmek nang menekuka banmekba, nunda sik donga tam uk banmapu. Weik cang keil foka deice kwanim tam arye ubuka banmapu ani, roti dana ati, weik cang aik el si ‘Menara,’ nyabuka domik ning ara, kirikuka otam biburye, pala keil foka nyalamik ning dam bipu.

³⁹Winibuka fia bana uk unmapurye, Efraim yala ninye sik bisik bublan kirikuburye, minop talak domik bisik bublan dam biburye, mekwen fum bal ikan bublan dam bipu. Abiburye, weik cang ning, el si Menara Hananael ap, tonda Menara Seratus nyabuka domika dam biburye, domba bobuka wekelbalamik bisik bublan dam bipu. Winibupu ura, nunce deiyok koubuka banmapu nang yupa nirya ara, Allah el si eren aik wekelban bisik bublan kalikna deiyok nang, sik aik dam sukumuk binuka deibupu.

⁴⁰Ayupa bitinye mot sepra banmapu ninye nirya ara, Allah Yahweh el si eren aik dam abinuka deibuka tikmopu. Ara, na ap yuk Israel yala ninye deiyok nang, noutam bokuka neika banmapu nang ap, asukum uk bulubupu. ⁴¹Asukum binuka deibubop ura, sik imam-imam nang arye pong-pong ana, el si terompet yupu nyabuka banmek nang ton asukum uk bulupmek. Sik si ara ani. Elyakim ap, Maseya ap, Minyamin ap, Mika ap, Elyoenai ap, Zakaria ap, Hananya ap atikmek.

⁴²Anang atonun, sik aminyan tam arye dukdongobuka banmek nang babye, anyaik dam tikmapuak uk, yanuka tikik. Sik si ara ani. Ara, Maseya ap Semaya ap, Eleasar ap, Uzi ap, Yohanan ap, Malkia ap, Elam ap, Ezer ap, sik winibuka nang ara, anyaik dam bulubuka tikmek. Sik mot sena kel nang ara, mot sepra banmek. Amot senmek talak ara, ‘Winipnulume,’ nyana ati, sik deiyoknye bira Yisraya ulamuk.

⁴³Israel ninye sik deiyoknye Gubenur Nehemia birye deiyok kibukba, weik asik Yerusalem dan-dana nirya weik cang keil foka donmek ning ati, keil yangabuka dadeipdanin balamikce, antanapdongobuka dolamika ani, afil akunum dobuka sirya dakdongobik ura, kanye deibuka weik arye mot sebuka lunmek. Tonda, sik weik ninye deiyok nang ayala-yala nirya ap, Allah el si eren aik fum fil dona deiyok nang, sik imam nang ap, tonda sik amutam fil melin nang, Lewi yala nang ap, Allah mot selamik nang ap, fia weik arye winimekce, mot senmek.

Tonda, 'Nun Ni Koprop Allah, weik melyamsuk deice arye, weik asik Yerusalem dan-dana keil foka dona ati, keil dikuka dadeipdanin balamuburye, antanapdongobuka domupu cang foka akunum sirya dakmaba ati, kanye deibabe' tenen, pin-pin asa arye unmek.

Ati, Allah el si erena ati, kam ning weik obukabikce, el ti aribikce, weik arye kanye deibik. Sik Israel yala ninye nirya, sal babye, kilapu babye, sik mapu babye, sik kil mapu nirya babye, kanye deibikce, pin-pin asa arye unmek. Weik asik Yerusalem noutam arye winimekce, lelim weik nyanmekba, sik pera mutuku ulamik nang arye kekenmek.

⁴⁴Ura, atalak ara, sik Israel ninye nirye arye, Allah el si erena ati, arelyangalamik ning ara, weik ulamuk anya arye, aning delin aik kalikna deiyok nang ton wipdeibik. Ara, sik Israel nang arye wa wibuka koulamik ning, minop fabuka nong ulamuk ning ap, sik wilamik ning min yuma ning minop delilamik ning ap, tonda, 'Nun Ni Koprop Allah ati, telebe nyapnuyap' tenen, arelyangalamik ning ap, Allah el si erena ati, anyaik delilyangalamikba, anang arye dopropna arye, anyaik deibuka kaliklamik. Aning winilamik ning ara, ani. Sik ulamik mutuku dana-dana nirya, wa wibuka koulamik ning, akunum duk moulamukba, winiryuk ning lipnob ura, Allah el si erena ati arelyangalamik.

Winilamik ning ara, Allah arye el mem yupu nyapdeiamuk noutam arye, 'Na si eren aik fum fil dona deiyok nang ap, sik amutam fil melin nang, Lewi yala nang ap, sik patan ning melina ati, aning-aning nirya anoutam arye bokuka, boyamunce arenamlume,' nyapdeibuk.

Ati, Allah arye nyapdeiamuk touk, arelyangalamik. Sik Yehuda tam ulamik nang nirye arye, Allah el si eren aik fum fil dona deiyok nang, sik imam nang ap, tonda sik fil melin nang, Lewi yala nang ap ati, kanye deibuka bico tenelamika ati, Allah arye nyapdeiamuk touk, sik ning ayala-yala nirya, tagu barye arye diprongobuka utam kintinipdeipnob ura, noutam bokuka tonok ning dobuka, Allah ati arelyangalamik. Ara, seper sepuluh (10%) nyalamak ning, bokuka arelyangalamik.

⁴⁵Allah el si eren aik fum fil dona deiyok nang, sik imam nang ap, sik amutam fil melin nang, Lewi yala nang ap arye, Allah el si eren aik fil teleb ubuka dolamik. Tonda, 'Israel ninye arye Allah el dam yating' tenen, sik malye ulamik ning kum danalina ati, Allah arye, 'Wininamlulume,' nyapdeibuk touk, afil ton dolamika deice arye, Israel ninye ati tuba tonap teleb ulilamik. Aning atonun, sik Allah mot selamik nang ap, weik asik Yerusalem dana-dana domik foka bublan botcamikak, kalikna deiyok nang ap, sik fil babye teleb ubuka dolamik. Aning-aning fil dolamik ning ara, minop talak Allah arye nyapdeiamukba, Raja Daud ap, el mi Solomo ap arye, "Winibuka unamlume," nyapdeamdik touk, afil dolamik.

⁴⁶Minop talak ara, Israel ninye talyamuk ninye deiyoknye, Raja Daud ap, tonda yuknye Asaf ap, ulamdik talak noutam ara, Allah mot sena

ati, deiyok nang ton wibuka delilamik. Adeiyok nang arye, sik Allah mot selamik nang ati, ‘Allah mot sena ati, winibuka-winibuka senamlulume,’ nyalilamikba, Allah mot selamik. Ara, Allah ati, ‘Se anda fia mambulnye ulyama ati, an ti telebe nyapkiyabe,’ nyana ati, Allah mot selamik. Minop talak ‘Winibuka wininamlume,’ nyapdeiamik yupu tuba ubuka anya arye, atalak babye, ayupu nyalamik touk, tuba ulamik.

⁴⁷Tuba ulamika ati, Gubernur Nehemia ap, tonda Zerubabel ap, ulamdik talak babye, sik Israel ninye nirye arye, asum-asum nirya sik talyamik ning noutam bokuka, sik Allah mot sen nang ap, Yerusalem mutuku dan-dana domik foka bublan domika, abublan dam kalikin nang ap ati, aning-aning nirya boyanuka arelamik. Aning atonun, sik Lewi yala nang patan ning melina ati, sik Israel ninye arye, sik talyamik ning noutam bokuka, arelyangalamik. Akunum aripnop ura, sik Lewi yala nang arye, aning bokukapna arye, Harun birye deiamukba, dadeipdanin yangalamik nang ati arelamik. Ara, Allah el si eren aik fum fil dona deiyok nang, sik melina ati arelamik.

Afil-afil nirya ara, Allah arye, “Aning ara wininamlume, aning ara kum wininamlume,” nyapdeiamuk touk winilamik.

Israel ninye tamubuka Yerusalem mutuku yangalamik talak ara, sik deiyoknye, Gubenur Nehemia birye winilamik ning ati, nyabuk yupu

13 ¹Allah el si erena ati, Israel ninye weik Yerusalem mutuku bulubuka yayik sum ara, sik deiyoknye Nehemia birye, “Winipnulume,” nyapdeibukba, Allah arye nyapdeiamuk yupu yinibikba, aninye nirya kekebik. Ara, Allah arye, “Aning ara wininamlume, aning ara fia kum wininamlume,” nyabuka lak nyapdeibukba, Musa birye sekiamuk yupu, yininmekba awekmek ninye nirya kekenmek. Allah yupu kekenmek talak ara, Allah yupu noutam sekeibuk ning ton kekebuka kel bikik. Ara, Allah arye nyapdeibuk.

“Moab yala ninye ap, Amon yala ninye nirya ara, asum-asum nirya ara, sik ayala ninye bitinye ap, neika dukdongobuka fia kum unamlume. Anggun Israel yala ninye unamlum mutuku nirya ara, abitinye yala kili sal ton, anggun dam kum yanganamyake. Aning ara fia meme,” Allah arye nyabuk. Aning ara, Allah yupu buku noutam eibuka kel bikik.

²Ayala ninye bitinye ap, neika kum unamaka deiyok ara, Israel ninye Mesir mutuku arye sakwetebuka, bisik yangalamik talak ara, abitinye mutuku ulamik ninye arye, din ning ap, mek ap, Israel ninye ati, ton fia kum arelamik. Kum arelamik atonun, amutuku talyamuknye Balak birye, ‘Israel ninye malye kipdeipnamle’ tenen, tonoknye el si Bileam yukubuk ura, yayukba, amutuku deiyoknye birye nyabuk. “Ance Israel yala ninye malye kilina ati, sik deice malye yupu nyapdeipminba, Allah arye aninye supdeipnamle,” nyabuka morobuk.

Utenebuka unmok bukni, Nun Ni Koproba Allah arye Bileam biti, teleb yupu uk aribukba, teleb yupu uk Israel ninye deice nyabuk. Winibuka deice arye, amutuku talyamuknye Balak birye, 'Israel ninye suptinye,' tenyamuk ning ara, kum kipdeibukce teleb ning weik aryamsuk.

³Ati, Allah yupu buku yininmek talak ara, sik Israel ninye nirye arye ayupu kekebikce, adib aryuk Allah arye, "Ayala bitinye ninye ap neika fia kum unamabe," nyapdeiamuk touk, "Atalak babye aning uk winipnuyabe," nyapdeibik. Ati, asum aryuk, sik yuk mutuku yala nang nirya ap, yuk yala ninye deiamik mapu nirya ap ara, dobuka, sik Israel yala ninye kan-kan arye yukak dopdeibik. Winibikce, sik ap yuk yala ninye ap, neika kum ulamik.

Imam Elyasib birye malye ning winibukba, Gubernur Nehemia birye, Elyasib arye malye winibuk ning ati, nyabuk yupu

⁴Min yuma talak arye, imam Elyasib bira, Allah el si eren aik fum tam wilibuka domik aik, bona delilamik aik ati, Israel ninye arye, "Anyaik kalikna deiyoknye unamsilame," nyabuka wipdeibik. Wipdeibik bukni, imam Elyasib bira, ninye ton el si Tobia biti, 'Na kwit,' tenyamuka anya arye, sik bitinye neika dukdongobuka yupu nyalamdik. ⁵Tobia ap, dukdongobuka ulamdika anya arye, Elyasib birye weik kamar aik ton Tobia biti nukuk. Minop talak ara, 'Anyaik ara Allah ati arenamak ning bulubuka delinamak' tenen, kintinipdeiamik. Ara, Allah el aik fum tam fil don nang ap, Allah ati arelamik gandum ap, nintong teleb ning el si ara, kemenyan ap, delina ati anyaik kintinipdeiamik.

Tonda, 'Lewi yala nang ati arenamap' tenen, persepulauan ning gandum ap, anggur tapu duk mek ap, zaitun yo duk mek ap, bulubuka anyaik delilamik. Tonda, aning noutam arye bokuka, sik pong-pong ana talibuka, mot sena deiyok nang ap, Allah el aik fum tam wekelban bisik bublan dam kalikna deiyok nang ap, sik yuk imam-imam nang ap ati, aning bokuka arelamik. Winilamika ati, aning-aning nirya dobuka, delinak ati anyaik kintinibuka delilamik. Bukni, Elyasib birye el kwit Tobia biti, anyaik nukuk.

⁶Aning winibukop ura, atalak na Nehemia bira Yerusalem mutuku ton fia kum ulamse. Ara, Babel mutuku ninye deiyoknye Arthasasta talibuka ulamuk talak, keteng tamun yupa fia weik 32 tahun akunum ubukba, na ara Babel mutuku tamubuka binmase. Babel mutuku deiyoknye Artasasta el dam lak nyalbinamse ati, Elyasib birye malye winibuk ning ara, na ton kekebuka kum kel bikamse. Lak nyabuka daulamse ani, "Naio, na mutuku koproba tuba tamubuka bitinye do?" nyabuka moropsiba, elce, "Telebe," nyapnukop ura, Babel mutuku batakuka, Yerusalem mutuku tamubuka yase.

⁷"Yerusalem mutuku tamubuka binamne," nyabuka moropsiba, elce, "Telebe," nyapnukop ura, yangalamsa ani Yerusalem mutuku yanuka

dinmasiba, imam Elyasib birye, el kwit koproba Tobia biti, tonok aik ara, Allah el si eren aik koproba, fum tam wilibuka domik aik ton nukamukba, eipsirye na lukdase.

⁸Na arye Elyasib ap Tobia ap ati, yu upnukba, wapsirye “Tobia an ning nirya bopraka bilyame,” nyabuka el ning nirya dobuka bai tam dopkwetepse. ⁹Winipsop ura, na arye, “Anyaik tuba tamubuka teleb kilina ati, winipnuyabe, winipnuyabe,” nyapsiba, anyaik fum tam nirya mek likukabuburye teleb kipdeibupu. Winibupop ura, Allah el aik koprop noutam fil don ning ati na arye boyanmase ning nirya ara aning uk tuba tonap, dobuka anyaik noutamak deibupu. Tonda, nintong teleb ning kemenyan ap, Allah arina ati gandum ap, delinak ati tuba tonap teleb ubuka kintinibupe.

¹⁰Tonda, sik amutuku ulamik ninye arye, Lewi yala nang ati delilyangan ning weik tonun ton kum delilyangalamikba, anang nirya ara Yerusalem mutuku batakukabikce sik wa wina ati, yuk-yuk mutuku dabinamik. Aning atonun, sik Allah el yupu mot sena kel nang ati, melibuka kum arelamikba, anang babye Yerusalem mutuku batakukabikce, sik wa wina ati, yuk-yuk mutuku dabinamik.

¹¹Aning nirya kekebuka biksirye, na malye kanye bopsirye, amutuku noutam talibuka, ‘Winipnuyabe,’ nyana deiyok nang ati wapsirye nyapse. “Anggunda yata deiyok ati, Allah Yahweh el si eren aik fil melin nang ati arin ning batakum do?” nyabukia wapse. Nyabuka wapsirye, Lewi yala nang ap, mot sena deiyok nang ap ati, “Tamubuka yalulume,” nyapsiba, yayikop ura bulubdeipsirye, “Anggun min arye yuk-yuk talibuka fil dolamlum touk, afil talibuka donamlume,” nyapdeipse.

¹²Afil akunum aripsop ura, Yehuda tam ulamik nang nirye arye Allah arina ati, persepuluhan ning bobuka arelyangalamik. Ara, gandum ap, anggur tapu duk mek ap, zaitun yo duk mek ap, boyanaba aning dobuka delin aik talyamuka deiyoknye dam bobuka delilyangalamikba, elce aning dobuka adelin aik fum bisik delilamuk.

¹³Aning delin aik fum tam talibuka ukirye, ‘Aning nirya moubuka kalikinamak’ tenen, na arye yuk nang ton, afil dona ati wipdeipse. Na arye wipdeipse nang ara, Imam el si Seleya ap, Allah arye nyapdeiamuk yupu sekna weik kelnye el si Zadok ap, tonda Lewi yalanye tonok el si ara Pedaya ap, wipdeipse. Anang sik amutam fil dona ati, ninye si Matanya birye deibuknye Zakur, el mi Hanan wipdeipse. ‘Sik anang melibuka fil donamak’ tenen, wipdeipsa deiyok ara ani.

Ara, anang-anang nirya ara, fia diksukum winin ning uk talibuka teleb uk ulamikba, amutuku ninye nirye arye, sik anang ati, “Sikda teleb nang uk unyake,” nyabuka si erelamik. Ati ara, anang wipdeipse. Anang wipdeipsirye nyapse. “Anggunda Israel ninye nirya arye, Allah el arina ati, aning-aning ayala-yala nirya boyacop ura, anggunce aning

dobuka Allah ati arenamlume. Tonda, Allah el si eren aik fum tam fil melibuka don nang, sik Lewi yala nang ati, mitiktonun bokuka anang ati arenamlulume,” nyapdeipsiba, afil talibuka dolamik.

¹⁴Afil-afil nirya dolamse ara, na ni Allah ati nyapse. “Diba na ni Allah, ance tenelamnulum touk, tonok ning babye kum bataksirye, ‘An aik noutam fil donamak’ tenen, wibuka deipman nang ap, sikce talibuka donamak fil nirya ap, an aik moubuka dolamse fil ap ara, Israel ninye arye an si erena ati, ‘Wininamlulume, aning wininamlulume,’ nyabuka lak nyalamse ning ap ati, ‘Ance bico tenebuka melinamnilam’ tenen, moropkine,” nyapse.

¹⁵Atalak ara, na arye dinmasiba, Sabat sum deice arye, yata barye nang do, Yehuda yala ninye weik arye, anggur tapu duk purulamikce, fil dolamikak eipse. Allah arye, “Sabat sum deice ara, fil tonok ning babye kum donamlulume,” nyapdeipsuk bukni, aninye arye yanibuka, ayupu kum kekelamike. Ton yuk ninye ara, gandum ap, anggur tapu duk ap, ara yo duk ap, yuk aning-aning nirya ap dobuka, keledai basam balye deice libuka deipmekce, Sabat sum deice arye Yerusalem mutuku yanganmek. Winipmekba na arye eipsirye, “Yata ati Sabat sum deice arye, aning ara dekelyanganmalum do?” nyabuka wenepse.

¹⁶Aning atonun, Tirus mutuku nang ton sik mining dam Yerusalem mutuku noutam aulamik nang arye, mek fum bal ikan ap, tonda yuk-yuk yala ning ap, sik talibuka ulamik ning nirya ara, Sabat sum deice arye boyanganmika ara, ‘Yudea tam ninye sikce deknamsiyak’ tenen, boyayik. ¹⁷Wininmekba ati, na arye, ‘Yata deiyok ati, Sabat sum deice arye wininmak do?’ tenen, Yudea tam talibuka weik ninye deiyok nang ati yu upnukba, “Yata deiyok ati malye wininamlum do?” nyapse. “Anggun aninye wininamlum deice arye, fia malye-malye weik wininmalumce, Sabat sum yanibuka malye kipdeipmalume,” nyapse.

¹⁸“Yata deiyok ati malye wininmalum do? Anggunce amalye wininmalum touk, minop talak nun apu yapu arye malye ulamikba, ‘Allah arye nun apu yapu nirya obuka sirya daklamuk touk, nun babye atonun wenepsuturye ikin ning deipsutue’ tenen, wininamlum do? ‘Allah arye nun tonap tabakuka opsutue,’ tenebuka, anggun Israel ninye arye, Sabat sum malye kilinmalum do?” nyapdeipse.

¹⁹Ara, Sabat sum otam upnin banamika nirya ati, asum arye deiyok koubuka nyanmase. “Yerusalem mutuku noutam foka antanapdongobuka dobuburye, botobupe bisik bublan ara, fia kum kukulinamlulume. Ara, pamu sum ara ipnamalya ati, min inipnin banmalye talak ara, adib aryuk bublan tirikilonamlulume. Winibuka tirikdongopmamunye touk upmale bukni, naku barye sum babye afia upnin banamle. Naku barye sum inipnamalya ati, min inipnin banmalye talak ara, tuba tonap abublan titiknamlulume,” nyapse.

Nyapsop ura, na mapu ton dobuka, ‘Abisik bublan dam nirya talibuka kalikinamak’ tenen, wipdeipsiba, kalikinmek. Ara, ‘Yuk mutuku nang ton sik bona yuka-yuka talibuka dekenyak nang arye hari jumat berentam talak arye dipdongobuka, Sabat sum noutam nirya, abisik bublan wekuka amutuku yanuka bona dekelyacak’ tenen, winipse.

²⁰“Wininamabe,” nyapdeipse yupu ara, sik yuk mutuku arye dekelyangalamik nang kum kekebika anya arye, Sabat sum deice arye Yerusalem mutuku wekelban bisik bublan dam yayikke, ‘Anyasik, weknuyap’ tenen, pirideyikke, bublan tirikmaupa arye, yanmanto kum ubikke, akeil foka buru tam mabuka unmek. Aning atonun, yata wiribuka sum do, yanuka piriptyeyikke, kum winipmanto ubukba, bai tam uk yanuka ulamik.

²¹Winilamikop ura, na arye anang ati ayupu ton nyabuka wapse. “Anggunda talye kanye bobuka kalikilulum do? Yata deiyok ati, nun cang keil foka dam malulum do? Sabat sum deice arye amutuku noutam akunum yangana ati, kum wekelyatume. Tonap aning atonun winipmunyop ura, na mikip arye wenepnamsine,” nyapse. Nyapsiba, ayupu kekebikke, asum arye dipdongobuka dotalak nirya, Sabat sum deice ara, kum dekelyangalamik.

²²Tonda na arye, sik Lewi yala nang ati nyapse. “Anggunda abublan dam kalikna ati, anggun nong ap, anggun butum aling ap mek likinamlume. Tonda, Allah arye, ‘Anggun nong teleb kilina ati, afile-afil donamlume,’ nyapdeiamsuk touk, afile ton donamlume. Winipmunyop ura, tuba tamubuka yamunce, abublan nirya kaliklamunya ani, Sabat sum ara, fia malye ton kum unamsile. Teleb uk unamsile. Asum ara, Allah el si uk erenamabe,” nyapse.

Nyapsa ati, na arye Allah ati moropse. “Se, na ni Allah, na arye, ‘Sabat sum tuba-tuba teleb uk unamsil’ tenen, aninye arye malye winilamik ning nirya ati, kum daneipse ning ara, kum luba kinalyame. Awinipse ning ati, ane na ti weik arye bico tenebuka melinamnilame,” nyabuka moropse.

²³Atalak na arye dinmasiba, Yahudi yala nang weik arye yuk mutuku Asdod mutuku kilapu ap, Amon mutuku kilapu ap, Moab mutuku kilapu ap, dolalamikba eipse. Allah arye, “Yuk mutuku kilapu ton bobuka kum dolanamlume. Israel yala kilapu uk dolanamlume,” nyapdeiamsuk bukni, yuk mutuku kilapu uk dolamika ak eipse. ²⁴Yahudi yala nang arye, yuk mutuku kilapu dolalamika ati, akilapu nirya ara, sik mutuku yupu koproba uk peterelamikba, sik mapu nirya ara ayupu uk kel biklamik. Ati, Yahudi yala mapu ulamik bukni, noutamak arye bokuka ton tam mapu ara, yuk mutuku yupu uk kel biklamik. Ara, Asdod mutuku yupu ap, tonda yuk-yuk mutuku yupu nirya ap kel biklamik. Israel ninye nyalamik yupu ara, kum nyalamik. Yudea mutuku noutam nyalamupu yupu ara, moubuka kum nyalamik.

²⁵Na arye sik aninye ati wenebuka supse. Winipsirye ton tam nang ara kama arye deplose. Ton tam nang ara, sik potong nirya kobuka batakse. Winipsop ura, na arye tamubuka nyapse, “Anggunda dipkoprop Allah el si deice nyalin yupu nyaplulume. ‘Nunda tuba tonap, nun kil mapu dobuka, sik yuk mutuku nang ati kum arenamabe. Tonda, nun mapu sik kil dona ati, yuk mutuku kilapu dobuka kum arenamabe. Tonda nun babye, yuk mutuku kilapu ton, fia kum dolbanamabe,’ nyalin yupu deice arye nyaplulume,” nyapse.

²⁶Na arye ayupu tonap dukdongobuka nyapse. “Amalye wininamlum ning ara, minop talak nun Israel ninye, nun ninye deiyoknye Raja Salomo birye winilamuka deice arye, malye weik winibukba, Allah arye el ti wenebuk. Salomo birye winilamuk touk yuk mutuku kilapu dopmalumce, talye kanye bobuka winimalum do? Salomo bira fia weik kel bikna ap, weik bona utotoa talinanye ulamukba, Allah arye bico tenebuka kanye delilamukce, ninye deiyoknye erepdeiamukba, Israel ninye ayala-yala nirya talyamuk.

Yuk mutuku weik ninye deiyok nang ara, Salomo fia teleb ulamuk touk, ton fia kum ulamik. Bukni, Raja Salomo birye, yuk mutuku kilapu weik dolamuka deice arye, fia malye weik winilamuk. Ara, Raja Salomo ulamuk talak ara, yuk mutuku kilapu fia weik dolamuka deice arye, sik akilapu talilamik ning uk, el babye talyamukce malye winilamuk.

²⁷Aning nirya ara, anggun akunum lupakipmalum do? Dipkoprop anggun ilil kumce, mandip kanye bobuka malye wininmaluma ara, Allah ati bisimunce, malye winilulume. Ara, anggunce yuk bai tam kilapu ak donmalumce, malye wininamlum ning ara, nun kekena like! Allah arye, ‘Winina meme’ nyapdeiamsuk yupu yaniptaplum ning ara, fia malye wininmalume,” nyabuka wenepse. ²⁸Tonda imam weik deiyoknye, el si Elyasib el mi Yoyada birye, Bed-Hor mutukunye, el si Sanbalat birye deiamuk kilmu dobuka anya arye, na arye Yoyada biti, “Yerusalem mutuku noutam ara, fia kum unamlyame,” nyabuka yakse.

²⁹Ati, na arye Allah ati nyabuka moropse. “Se, na ni Allah ance, ‘Anang ara imam nang upnamak’ tenen, wibuka deiamlum bukni, an si yanibuka malye winilikinyake. Tonda, ance, sik imam nang ap, Lewi yala nang ap ati, ‘Aning ara wininamlume, aning ara kum wininamlume,’ nyapdeipsulum yupu ara sikce yaninyake. Ati, sikce malye wininyaka ara, ance tuba tenipmince, anang ati wenenalyame,” nyabuka moropse.

³⁰Winibuka Israel ninye ap, bai tam ninye ap, sikce ansinibuka malye winilamik ning nirya wibuka dopropse. Tonda, sik imam nang ap, Lewi yala nang ap arye, yuk mutuku ning dobuka talilamik ning nirya ara, dobukapsirye, kum kipdeipse. Winipsirye, Allah arye, ‘Anang teleb kilina ati, afil donamlume,’ nyapdeiamsuk touk, afil dopsiba sik nirya tuba tonap teleb kipdeipse. Afil nirya dobuka sirye daksop ura, sik imam nang

ap, sik Lewi yala nang ap ati, Allah arye, ‘Wininamlulume,’ nyapdeiamuk touk, ‘Sik yuk-yuk talibuka fil donamak’ tenen, fil dona deiyok ning yuk-yuk bokuka aripse.

³¹Na arye, “Winibuka wininamlume,” nyapdeiamse ning nirya, akunum kintinipsop ura, ‘Sikce afil donamap, tenebice talak uk donamak’ tenen, kintinipse. Ara, ‘Amutuku unamak ninye arye sik wininamak ning nirya delilyakiba, uku dongonamak’ tenen, na arye yo nirya akunum kintinibuka deipse.

Tonda, ‘Amutuku ninye arye sik ning min yuma ning nirya boyakiba, sik imam nang ati aribikiba, Allah el si erena ati, uku dongonamak’ tenen, na arye kintinipse.

Winipse ning ati Allah moropsirye, “Na ni Allah na winipman ning ati, ance kum luba kipnamlyame. Fia tenenamlyame. Winibuka tuba tenenimince na tibuk bico tenebuka na dam aumince, teleb kibuka melinamnilame,” nyabuka moropse. Na Gubernur Nehemia birye nyapse. Akunuma.